

DISCIPLESHIP SERIES

1. PAGTUGYAN
2. PAGKA-GINOO
3. PAGPAKISAYOD SA GINOO
4. ANG TINGOG SA DIOS
5. UPAT KA PAAGI SA PAGKINABUHI
6. GAGMAY'NG PANAGTIGOM
7. ANG IGLESIA
8. TRABAHO
9. ULIPON SA DIOS
10. ANG SUNDALO SA DIOS
11. PAGPANALANGIN SA UBAN
12. PAGPADAGHAN UG LIWAT

PAGTUGYAN (Discipleship Series: Lesson 1)

Makapangutana kta nganong daghan ang mga Kristohanon nga maayo ang ilang pagsugod dinha sa Ginoo pero sa lang pagpadayon nabugnaw sila ug ang uban mibalik gayod sa ilang daang pagkatawo nga unta ila naman kining nahubo dinha ni Kristo. Ang uban nagpadayon gihapon sa pagsimba pero wala na mahiusa ang ilang kasingkasing ngadto sa Dios. Daghan ang posibleng mga rason nganong nahitabo kini, pero ang usa sa pinakamahinungdanong rason mao nga ang ilang **'pagtugyan'** ngadto sa Ginoo depektado. Maghisgot kita karon ug upat ka klaseng pagtugyan, ang tulo nini sayop ug ang ika-upat mao ang sakto (Basaha ang Lukas 9:57-62).

UPAT KA KLASSE NGA PAGTUGYAN:

1. PAGTUGYAN NGA ADUNAY KONDISYON

- Adunay tawo nga mingon kang Jesus nga *'mosunod ako kanimo bisan asa ka moadto'* ug ang tubag sa atong Ginoo sukwahe kaayo sa tubag nga ginapaabot sa maong tawo Imbis nga moingon ang atong Ginoo *'dali aron mapanalanginan ka ug mouswag'* hinuon ang iyang tubag mao nga, *"Ang mga mio may tagoanan, ug ang mga langgam may mga salag, apan walay kahigdaan ug kapahulayan ang Anak sa Tawo"* nga ang *pasabot dunay kalisod kung mosunod ka kanako"* (Lukas 9:57-58). Nasayop ba si Jesus sa iyang pagtubag? Wala. Iya kining gisulti tungod kay nasayod siya sa kasingkasing

ining tawhana nga gusto lang mosunod kaniya tungod kay adunay kahamugaway.

- Daghan sa mga Kristohanon ang sayop ug motibo nganong mitugyan sila sa ilang kinabuhi ngadto kang Kristo. ***Misunod sila sa Ginoo tungod sa mga milagro nga ilang nakita*** (Juan 6:2) ***ug ang uban tungod sa mga panalangin nga materyal nga lang makuha*** (Juan 6:26)
- Kininga klase nga pagtugyan ug pagsunod huyang kaayo tungod kay kon wala na silay makitang mga milagro ug kung wala na silay madawat nga mga panalangin di na sila mopadayon pagsunod sa Ginoo. Mao kini ang hinungdan nganong daghan sa mga tinun-an ni Ginoong Jesus ang mitalikod kaniya sa iyang kapanahonan (Juan 6:66) Kadto lang nakaila kinsa si Jesus maoy magpabilin hangtod sa kahangtoran (Juan 8:62-69).

2. PAGTUGYAN HUMAN SA MGA AMBISYON

- Si Jesus miingon sa laing tawo ‘*sunod kanako*’ apan ang tawo mingon kaniya “*ako usang ilubong ang akong amahan.*” Ang atong Ginoo mimando “*pasagdi ang mga patay sa espiritu nga maoy molubong sa minatay apan ikaw lakaw ug iwali ang Ginghamian sa Dios karon dayon!*” (Lukas 9 59-60) Posible kaayo nga ang amahan sa lalaki wala pa namatay ug gusto niya nga hulaton usa nga malubong kini una siya moalagad. Si Jesus mingon kaniya. “**Karon ka mangalagad dili ogma**”
- Adunay mga tawo nga dili gayod makatugyan ngadto sa Ginoo ug sa iyang trabaho tungod kay daghan pa kaayo sila ug ginabuhat para sa ilang kaugalingon. Ang

ilang tubag kanunay “*unya na human nako kini mabuhat.*” Kanunay nila ginapaulahi ang gusto ipabuhat sa Ginoo. Dili kaayo importante ang katuyoan sa Dios sa ilang mga kinabuhi kondili ang ilang mga plano ug pangandoy. Nagsaad sila ug pagtugyan human nila mabuhat ang gusto nila buhaton.

3. PAGTUGYAN NGA DILI HINGPIT

- May laing tawo na usab nga miingon ‘*mosunod ako kanimo, sir, pero manamilit usa ako sa akong banay.*’ Si Jesus mitubag ‘Kinsa gani kadtong mosugod pagdaro ug unya magpunay’g lingi dili angay sa Ginghamian sa Dios’ (Lukas 9:61-62).
- Adunay mga Kristohanon nga nagsogod sa pagdaro sa Ginghamian sa Dios pero nagsigi pa gihapon ug lingi sa mga butang sa kalibotan. ***Aduna pay mga gapos ug tali ang ilang mga kinabuhi mao kanunay mahiwi ug madaot ang ilang pagdaro sa Ginghamian.*** Dili kompleto ang ilang pagtugyan ngadto sa Ginoo. Mao kini sila ang mga badlongon sa pamilya sa Dios. Mga Kristohanon nga aduna pay daghang mga hikot gikan sa Yawa ug sa kalibotan.

4. ANG DIOSNON NGA PAGTUGYAN

Tulo ka kinaiya sa diosnon nga pagtugyan:

i. Ang pagtugyan nga walay kondisyon

"Bisan pag dili na mamulak ang igerang ni mamunga ang mga paras ug ang mga olibo; ug bisan pag wala nay maaning abot sa kaumahan, mangamatay na ang kahayopan, ug wala nay sulod ang ang mga puy-anan, magmaya gihapon ako kay ang Ginoong Dios mao may akong manluluwas".

- Adunay panalangin ug wala, tubagon o dili ang mga pag-ampo, sa kaharohay ug kapait mosunod gihapon kita sa atong Ginoo: Mao kini ang gibuhat ni Job (Job 1:13-21)

ii. Ang pagtugyan ngadto sa katuyoan sa Ginoo

- Kitang tanan gitawag aron pagsalikway sa atong mga tawhanong pangandoy ug pagtugyan sa atong kinabuhi ngadto **kaniya** ug sa **iyang katuyoan** (Marcos 8:35). Sa dihang atong madunggan ang iyang pagtawag kanato dili kita magmakuli ni maglangaylangay sama sa gibuhat Pedro, Andres, Santiago ug ni Juan nga "dihadiha" mibiya unsay gipabiyaan ni Jesus ug mibuhat unsay iyang gipabuhat (Mateo 4:18-22)

iii. Ang pagtugyan nga walay lingi-lingi

- Una misunod si Eliseo (Elisha) kang Elias (Elijah) aron mahimong alagad iya usang gipatay ang iyang 12 ka baka ug iyang gigamit pagsugnod ang mga yugo niini (1 Hari 19:19-21). **Mao gihapon kita aron epektibo nga mosunod ug moalagad sa atong Ginoo kinahanglan mopatay sa tanang naghawid kanato.** Kinahanglan atong sunogon ang tanang butang nga posible pang atong lingion ug balikan. Kinahanglan usa na lang ang atong ambisyon niining kinabuhia: **ang pagsunod sa Ginoo bisan asa kita niya giyahan ug ang pagbuhat sa iyang trabaho bisan unsa kini ka lisod!** Mao kini ang tinuod nga pagtugyan.

PAG-APLIKAR NGA MGA PANGUTANA:

- ❖ Unsay atong motibo nganong misunod sa Ginoo? Pagdawat o paghatag?
- ❖ Sa upat ka klase nga pagtugyan asa nimo makita ang imong kaugalingon?
- ❖ Anaa na ba kanimo ang tulo ka kinaiya sa diosnon nga pagtugyan? Unsay wala pa?
- ❖ Unsay maayo natong buhaton aron ang atong pagtugyan sa Ginoo mag-anam kakusgan?

PAGKA-GINOO

(Discipleship Series: Lesson 2)

“Ug ang tanan magsangyaw nga si Jesu-Kristo mao ang Ginoo, Alang sa himaya sa Dios nga Amahan.”

Filipos 2:11

Ang “Pagka-Ginoo” usa sa mga pinaka-importante nga pagtulun-an sa Biblia. Ang pulong “Ginoo” (Lord) nasulat sa Biblia sa 7,404 ka besis. 618 ka panahon sa Bag-ong Tugon. Ang pulong “Manluluwas” (Savior) nasulat lang sa 55 ka besis. Ang gitagaan ug dakong kabug-aton sa Biblia mao gayod ang pagka-Ginoo. Ang pulong Ginoo nagpasabot ug “agalon”, diin siya ang magbuot, ug maghimo ug desisyon.

ANG PAGKA-GINOO IMPORTANTE SA KALUWASAN

Ang sinugdanan sa kaluwasan mao ang pag-ila nga si Kristo mao ang Ginoo. Ang pagkompisal nga si Jesus Ginoo nagpasabot nga ikaw mitugyan kaniya ug imo siyang gitugotan nga mahimong Ginoo (magbuot) sa tanang aspeto sa imong kinabuhi. ***Kung si Jesus dill Ginoo sa tibuok nimong kinabuhi, dill siya imong Ginoo.*** Dili mahimo nga ato lang siyang idawaton nga manluluwas ug di Ginoo “Manluluwas” ug dili “Ginoo.” Maluwas ka kon imong dawaton si Jesus nga Ginoo.

"Maluwas ka kon ipahayag mo nga si **Jesu mao ang Ginoo**, ug sa kinasingkasing motuo ka nga gibanhaw siya sa Dios.”

Roma 10:9

ANG PAGKA-GINOO NAGKINAHANGLAN UG PAGTUMAN

Kinsa kadtong moangkon nga si Kristo iyang Ginoo kinahanglan motuman unsay iyang isulti ug imando. Ang pagtuo sa hunahuna ug ang taphaw nga pagkompisal dili igo. Kung moingon kita nga si Kristo atong Ginoo, kinahanglan makita kini sa atong kinabuhi nga matinumanon.

"Nganong nagtawag man kamo kanako, ‘Ginoo, Ginoo’ nga dili man kamo mobuhat sa akong gisugo kaninyo?”

Lukas 6:46

“Dili ang tanan nga magtawag kanako ‘Ginoo, Ginoo’ makasulod sa Gingharian sa langit, kondili kadto lamang nagtuman sa kabubut-on sa akong Amahan nga atua sa langit.”

Mateo 7:21

ANG PAGKA-GINOO MAGSUGOD SA KASINGKASING

Ang pagsabmitar sa pagka-Ginoo ni Jesu-Kristo dili pagsunod ug mga relihiyoso nga balaod o pagtuman ug mga tradisyon. Hinuon, ang pagka-Ginoo ni Jesus nganhi sa atong kinabuhi magsugod nganhi sa atong kasingkasing. Magsugod kini sa usa ka "masinugtanon nga kasingkasing" (yielded heart). Kung tinuod kini nga pagsabmitar, makita kini diha sa gawas nga binuhatan. Dili igo nga atong baba modeklarar nga si Jesus Ginoo, kinahanglan nga siya gyud ang tag-iya sa atong kasingkasing!

"Hinunoa pasidunggi ninyo si Kristo diha sa inyong mga kasingkasing, ug himoa siya nga inyong Ginoo

1 Pedro 3:15a

ANG PAGKA-GINOO KINAHANGLAN MAKANUNAYON

Nagsugod ang atong Kristohanon nga kinabuhi pinaagi sa pag-ila nga si Jesu-Kristo Ginoo. ***Magpadayon kita pagkinabuhi ilalom sa iyang pagbulot-an hantod sa tibuok natong kinabuhi.*** Ang pag-ila sa pagka-Ginoo ni Jesus dili sa makausa lang nga kasinatian, kondili sa adlaw-adlaw. Kinahanglan makanunayon ang pagpalalom sa atong relasyon kaniya. Sa magkalalom ang atong pag-ila kaniya mosamot kit aka masinugtanon kaniya.

“Sanglit gidawat naman ninyo nga Ginoo si Kristo Jesus, pagkinabuhi kamo nga hiniusa kaniya. Ipatidlom pag-ayo diha ang inyong mga gamut, ug ipabarog ang inyong kinabuhi diha kaniya...”

Colosas 2:8-7a

ANG PAGKA-GINOO ALANG SA TANANG ASPETO SA ATONG KINABUHI

Kinahanglan Ginoo si Jesus sa atong mga:

RELASYON

Ang atong pagtahod kaniya mas labaw kay sa bisan kinsa nga tawo, bisan pa gani sa mga myembro sa atong pamilya Mas tumanon nato siya kay kang bisan kinsa. Nag-ingon si Jesus nga kung atong ikompara ang atong paghigugma kaniya ngadto sa atong mga minahal sa kinabuhi mura nalang kini ug pagdumot.

"Kinsa kadtong moari kanako nga dil magdumot sa iyang amahan ug inahan, sa iyang asawa ug mga anak ug mga igsoon..... di mahimong akong tinun-an"

Lukas 14:26

KAUGALINGON

Kinahanglan mas higugmaon nato ang Ginoo labaw kay sa atong kaugalingon. Dili na kita ang matuman kondi siya na. Dili na kita maghimo ug mga desiyon nga supak sa iyang kabubut-on. Ang ato nang ambisyon mao ang paglakaw sa iyang plano ug katuyoan.

"Kinsa kadtong moari kanako nga dili magdumot... sa iyang kaugalingon, dili mahimong akong tinun-an Ug kinsa kadtong di mopas-an sa iyang krus ug mosunod kanako, dili mahimo nga akong tinun-an"

Lukas 14:26-27

PANALAPI

Mas higugmaon nato si Jesus kay sa mga butang nining kalibotana Daghang mga Kristohanon ang nahulog sa paghigugma sa salapi, mao nga nawala sila sa ilang pag-alagad sa Dios ug nahiagom sa daghang mga kagul-anan ug kasakitan (1 Timoteo 6:10).

"Sa samang pagkaagi, walay bisan kinsa kaninyo nga mahimong akong tinun-an gawas kon iyang biyaan ang tanan niyang katigayonan."

Lukas 14:33

- Ang tinuod nga magtutuo nagadumili na sa ilang kaugalingon aron si Kristo na ang mahimong Ginoo sa lang kinabuhi. Si Apostol Pablo nagkinabuhi nini nga kamatuoran. Siya mingon, "Gilansang ako uban kang Kristo didto sa krus, busa dili na ako ang nabuhi kondili si Kristo na nga ania kanako. Ug kining kinabuhi ko karon akong gikinabuhi diha sa pagtuo ko sa Anak sa Dios nga nahigugma kanako ug nagpakamatay alang kanako" (Galacia 2:20).

PAG-APLIKAR NGA PANGUTANA:

- ❖ Unsay aspeto sa atong kinabuhi nga si Kristo dili pa ang Ginoo (relasyon, panalapi, panahon kaugalingon)? Andam ka ba motugyan nini?
- ❖ Unsay mahitabo kung si Jesus na ang nagdumala sa tibuok natong kinabuhi (Gal 2:20)?
- ❖ Unsaon nimo pagkahibalo nga ang salapi na ang imong agalon ug dili na si Jesu-Kristo?

PAGPAKISAYOD SA GINOO

(Discipleship Series: Lesson 3)

Ang Biblia nagsulti nga ang Dios naghatag ug grasya sa mga mapaubsanon apan nagakontra sa mga mapahitas-on (Santiago 4:6). Ang Dios nagdumili sa mga garboso.

UNSA ANG GARBO?

Ang Unang Binuhat nga Nagbaton ug Garbo

Ang unang binuhat nga nagbaton ug garbo mao ang usa sa mga pangulong anghel sa Dios, si Lucifer (Ezequiel 28:12-17). Tungod sa iyang katahom ug kaalam gusto niya mahimong susama sa Dios (Isaias 14:12-14). Nagrebelde sa Dios si Lucifer ug nakadala ug katloan (1/3) sa mga kauban niyang anghel sa langit (Gipadyag 12:4). Nagpuyo sila karon nga wala mailalom sa pagbulot an sa Dios. Mao kini ang garbo. Pagpuyo nga kinaugalingon. Pagpuyo nga dili hiniusa sa Dios (independent of God). Ang garbo nagsugod sa kasingkasing ni Lucifer nga nahimong Yawa.

Si Adan Nahimong Garboso

Ang Yawa mitintal sa unang tawo pagsupil sa kabubut-on sa Dios aron siya mahisama na sa Dios, independente sa kaugalingon (Genesis 3:4-5). (Ang Dios nga maoy nagbuhat sa tanan mao ray independente tungod kay wala siyay gisaligan.) Sa dihang mikaon si Adan sa prutas nga ginadili sa Dios nahitabo gyud kini. Nahimo gyud siyang independente gikan sa Dios. Ang unang 'sala' sa tawo mao ang 'garbo.' **Ang pagtuman sa kaugalingon ug dili unsay gusto**

sa Dios. Sama sa Dios, aduna na siyay kaugalingong sukdanang unsay maayo ug unsay daotan.(Genesis 3:22) Nagpuyo na siya nga dili hiniusa sa Dios sama sa Yawa. Tinuod nahimo siyang independente gikan sa Dios pero nagapos man usab siya sa gahom sa panulay (2 Corinto 4:4; Efeso 2:2)

Ang Garbo Napasa Ngadto Sa Tanang Tawo

Tungod kay wala naghinulsol si Adan, kining daotan nga kinaiya' napasa ngadto sa tanang tawo (Roma 5:12). Ang makasasala nga tawo nasalaag na sa mga pamaagi sa Dios ug naghimo na ug kaugalingong dalan (Isaias 53:6). Ang tawo nagasalig sa iyang kaugalingong katakos, kaalam, kahibalo, ug kasinatian. Nasininaan ug nagpuyo na siya sa garbo. Ang ubang garboso nga tawo mituo sa Dios sa ilang hunahuna pero sa tinuod nga pagkinabuhi nagasalig sila sa ilang kaugalingon. Ang sentro sa ilang kinabuhi mao ang ilang kaugalingon. Kuyaw ug maayo na kaayo ang ilang panan-aw sa ilang kaugalingon busa wala na sila nagasalig sa Buhi nga Dios. Ang ilang pagsalig anaa na sa kusog sa tawo.

TINUNGLO ANG TAWO NGA NAGASALIG SA KUSOG SA TAWO

Nag-ingon ang GINOO, 'Silotan ko ang tawo nga motalikod kanako,ug mosalig hinuon sa mga ugang va kusog sa tawo. Sama siya sa usa ka kupongkupong sa kamingawan, nga nagtubo sa maanokon Sa yuta nga parat diin walay laing tanom nga moturok ug wala gayoy maayo nga maangkon niya."

Jeremiah 17:5-6

Kadaot ang moabot sa tawo nga nagasalig sa tawo o sa iyang kaugalingon. Atong sabton nga wala kita gibuhay para magpuyo nga mag-inusara. Gibuhay kita nga magpuyo uban sa Dios. Tinunglo ang binuhay creation) nga mahimulag sa iyang Magbubuhay (Creator).

PANALANGIN ANG MOABOT SA TAWO NGA MOSALIG SA DIOS

Apan panalanginan ko ang tawo nga mosalig kanako. Mahisama siya sa kahoy duol sa tubig: mokuyanap ang mga gamot niini ngadto sa sapa. Dili siya mabalaka kon ting-init na, kay dili matagas ang iyang mga dahon. Kondili moulan dili gihapon siya mabalaka, ug magsigi siya ug pamunga."

Jeremias 17:7-8

ANG TAWO NGA NAGASALIG SA DIOS KANUNAY MAGPAKISAYOD KANIYA

"Salig sa GINOO sa bug-os mong kasingkasing. Ayaw gayod pagsalig sa imong kaalam. Hinumdomi ang GINOO sa tanan mong buhaton,ug tultolan ka niya sa matarong nga dalan."

Panultihon 3:5-6

Ang tawo nga garboso ug 'bilib sa sarili kanunay nagasalig sa iyang kaalam apan ang tawo nga nagasalig sa Dios kanunay gyud magpakisayod sa Dios. Ang tawo nga mapainubsanon dili gusto mobuhay ug butang nga dili iya sa Dios, busa kanunay siya magpakisayod sa Ginoo. Iyang gitan-aw ang Ginoo nga giya sa tanan niyang pagabuhaton. **Ang pagpakisayod sa Ginoo una mohimo ug mga desisyon timailhan sa usa ka kasingkasing nga mapainubsanon.** (Dili na kita kinahanglan magpakisayod sa Ginoo kung atong buhaton o dili ang mga nahasulat na nga mando

sa Dios sa Biblia [revealed will of God] ug sa mga katungdanan nato ngadto sa atong kaugalingon, pamilya, trabaho, iglesia, komunidad, ug nasod. Buhaton na lang nato kini uban sa kaalam ug katakos sa Dios.)

ANG PRINSIPYO SA PAGPAMINAW SA DILI PA MOBUHAT

Mao kini ang gipakita ni David samtang nagkinabuhi pa siya dinhi sa kalibotan. Gitawag siya ug tawo nga kanunay nagapangita sa kasingkasing sa Dios! Tinuod adunay mga kakulangan si David sa iyang panahon apan makita nato sa Biblia nga iyang gianad ang iyang kaugalingon pagpakisayod sa Ginoo una siya mohimo ug desisyon (1 Samuel 23:1-2). Walay tawo o problema nga makapalihok kaniya gawas lang sa "tingog sa Ginoo" (1 Samuel 23:3-5; 30:8). Tungod niini nga kinaiya, **"pagpakisayod sa Dios una mobuhat ug desisyon,"** kanunay siya nagmadaogon batok sa iyang mga kaaway.

Sa pagpakatawo ni **Jesus** dinhi sa kalibotan mao usab kini nga prinsipyo ang iyang gisunod. Miingon siya, **"Sultihan ko kamo: ang Anak walay mahimo sa iyang kaugalingon; nagbuhat lamang siya sa nakita niya nga gibuhat sa Amahan. Ang gibuhat sa Amahan gibuhat usab sa Anak"** (Juan 5:19). Ang nagtukmod sa tanang ginabuhat ni Jesus dili ang mga panginahanglanon sa palibot kondili ang Espiritu sa Amahan nga anaa sa iyang kinasuloran (Juan 14:10). Si Jesus dili mobuhat ug butang gawas kung kini kabubut-on sa iyang Amahan. Wala siya nagasalig sa iyang kaugalingon kondili sa iyang Amahan nga nahigugma kaniya. (Juan 5:20).

KINAHANGLAN MAKADUNGOG KITA SA TINGOG SA DIOS

Si Jesus ang atong modelo unsaon pagkinabuhi dinhi sa kalibotan (1 Juan 2:6). Kinahanglan kahiralo kita maminaw ug moila sa tingog sa Dios aron makabuhat sa iyang hingpit nga kabubut-on. Atong sabton nga bisan ug unsa ka maayo ang atong mga ginabuhat kung dili kini iya sa Dios patay gihapon kini nga buhat (dead works). Kinahanglan isul-ob nato ang pagpaubos pinaagi sa pagpakisayod sa Ginoo sa tanan natong mga importanteng desisyon. Mohatag kita ug panahon sa pagpaminaw sa tingog sa Balaang Espiritu kay siya andam mogiya kanato ngadto sa kadaogan, pag-uswag, ug kalamposan.

PAG-APLIKAR NGANG PANGUTANA:

- Nagapakisayod ba kita sa Ginoo sa mga importanteng desisyon? Sa unsang paagi?
- Aduna bay panahon nga nakadungog kita sa tingog sa Ginoo nga migiya kanato?
- Aduna bay garbo sa atong kinabuhi?

ANG TINGOG SA DIOS

(Discipleship Series: Lesson 4)

ANG DIOS GUSTO MAKIG-ISTORYA KANATO

Ang Biblia nagsulti nga ang Dios gusto ug relasyon ngadto sa mga tawo nga iyang gibuhay sumala sa iyang panagway. Nakig-istorya siya sa mga tawo sa Karaang Tugon ug sa mga tawo sa Bag-ong Tugon. Nagpadayag siya sa iyang kaugalingon, kinaiya, mga pamaagi, ug mga katuyoan. Buhi ang atong Dios ug dili siya mausab hangtod sa kahangtoran (Malaquias 3:6). Kung siya nakig-istorya kaniadto siya usab moistorya karon sa atong kapanahonan. Nag-imbatar siya kanato, personal o hinugpong, nga maminaw sa iyang tingog. Ang iyang mando ngadto sa "pito ka iglesia" sa libro sa Gipadayag nga maminaw sa tingog sa Espiritu Santo, para usab kanato karon. "Busa kon may dalunggan ka, pamatia ang giingon sa Espiritu ngadto sa mga Iglesia!" (Gipadayag 2:7, 11, 17, 29: 3:6, 13, 22).

MAKADUNGOG KITA SA DIOS

Kung gusto sa Dios nga makadungog kita sa iyang tingog kini nagpasabot nga tagaan usab kita niya ug katakos nga makadungog. Tungod kay nahiusa na kita kang Kristo natangtang na ang atong karaang espiritu ug napulihan na ug bag-o (Ezequel 36:26; 2 Corinto 5:17). Dugang pa niana napuy-an na usab kita sa iyang Espiritu (Ezequel 36:27). Tungod niini makadungog na kita sa iyang tingog. Aduna na kitay espirituhanong dalunggan (Gipadayag 2:7). Ang tanang mga anak sa Dios makadungog sa tingog sa ilang Amahan sa langit (Roma 8:14, 16). Ang tanang karnero sa Dios makadungog ug makaila sa tingog sa ilang Magbalantay.

"Ang akong mga karnero mamati sa akong tingog; nakaila ako kanila ug sila nagsunod kanako."

Juan 10:27

NGANONG KINAHANGLAN KITA MAKADUNGOG SA DIOS?

1. Aron molalom ang atong relasyon sa Amahan.

Walay molalom nga relasyon kung walay pag-inistoryahay. Atong nasabtan nga ang pag-ampo dili lang 'pag-istorya' sa Dios kondili 'pagpaminaw' usab kaniya. Adunay panahon nga kita ang mosulti ug duna say mga panahon nga kita na usab ang mamati. Si propeta Isaias misulti sa iyang kasinatian sa Dios nga, "Matag buntag gidasig niya ako sa pagpaminaw sa buot niyang itudlo kanako" (Isaias 50:4b). Lalom ang relasyon ni Propeta Isaias sa Dios tungod kay nagapaminaw siya sa iyang tingog.

2. Aron makasunod kita sa Ginoo ug makabuhay sa iyang hingpit nga kabubut-on.

"..ug ang mga karnero mosunod kaniya, kay nakaila man sila sa iyang tingog."

Juan 10:4

"Busa ayaw kamo pagkabuang, kondili paningkamoti nga masayran ninyo ang kabubut-on sa Ginoo alang kaninyo."

Efeso 5:17

3. Aron atong madawat ang kaalam ug mga tinagong butang sa Dios.

Apan gipadayag kanato sa Dios ang iyang tinago pinaagi sa iyang Espiritu. Ang Espiritu nagsusi sa tanang mga butang, bisan pa niadtong labing natago nga mga katuyoan sa Dios."

1 Corinto 2:10

MGA PAMAAGI DIIN ANG DIOS MAKIG-ISTORYA NGANHI KANATO

Daghan kaayo ang pamaagi nga gihisgutan sa Biblia unsaon sa Dios pakig-istorya ngadto sa tawo. Maghisgot lang kita karon ug pito ka paagi nga kanunay niya ginagamit ngadto sa iyang mga anak nga nagbaton na sa iyang Espiritu (Roma 8:15).

1. **Biblia (Bible)** - Ang Dios makig-istorya sa atong kinabuhi pinaagi sa Biblia. Sa makadaghang panahon, samtang nagabasa kita sa Biblia, mohatag siya ug mga buhi kaayo nga bersikulo nga nakig-istorya kanato. Kini nga mga pulong hait kaayo nga modulot sa atong kasingkasing ug kalag (Hebreo 4:12). Gitawag kini ug "rhema words." (Sa dugang pagpasabot niini basaha ang "Lesson 4" sa "Maturity Series")

2. **Tingog sulod sa atong espiritu (Inner Voice)** - Ang Espiritu Santo anaa na sulod kanato busa ato nang madunggan ang iyang tingog (1 Corinto 6:19; Roma 8:14).

3. **Kalinaw sa Dios (Peace of God)** - Adunay mga panahon nga ang Dios magagiya kanato pinaagi sa kalinaw. Niini, ang Espiritu Santo mohatag ug talagsaong kalinaw sulod sa atong kasingkasing timaan nga ang desisyon iya sa Dios (Colosas 3:15).

4. **Panan-awon (Vision)** - Usahay ang Dios magahatag kanato ug hulagway sa atong

hunahuna (vision), ug kini iyang gamiton aron makig-istorya kanato (Buhat 10:9-13).

5. **Damgo (Dream)** - Aduna say panahon nga ang Dios makig-istorya kanato pinaagi sa damgo sama sa iyang gibuhay ngadto kang Jose (Mateo 1:20).

6. **Espirituhanong Pangulo (Spiritual Leaders)** - Ang Dios sa makadaghang panahon mogamit ug mga tawo aron makig-istorya kanato, ilabi na sa atong mga pangulo sa iglesia (Hebreo 13:17). Busa ato silang tahoron ug respetohan (1 Tesalonica 5:12-13).

7. **Panghitabo (Circumstances)** - Ang Dios puwede usab mogamit ug mga panghitabo o sitwasyon aron mohatag kanato ug mensahe sama sa nahitabo kang Jonas (Jonas 1:12).

UNSAON PAG-ILA SA TINGOG SA DIOS?

Dili tanang tingog iya sa Dios bisan ug unsa pa kini ka klaro ug kakusog. Adunay mga tingog nga naggikan sa mga bakakong espiritu (1 Timoteo 4:1). Kinahanglan atong sulayan ang mga tingog nga atong nadunggan kong iya ba kini sa panulay, sa tawo lang, o gikan gayod sa Dios. Kinahanglan nga ang tingog nga atong nadunggan...

1. Dili mosupak sa mga prinsipyo sa Biblia (Biblical)

- Kinahanglan nga ang atong nadungog dili mosukwahi sa mga prinsipyo sa Biblia ug sa mga pamaagi sa Dios. Ang mga mensahe sa Dios mouyon sa iyang nasulat na nga pulong (written word), nga mao ang Biblia. Kung adunay tingog nga supak sa Biblia dili kini

iya sa Dios. Ang tinuod nga sukdanan mao ang Balaang Pulong (2 Timoteo 3:16-17).

2. Mopataas ug mohimaya kang Jesus (Jesus is Exalted)

- Kung ang tingog nga atong nadunggan mopataas ug tawo, pundok, o kalihokan labaw pa kay kang Kristo dili kini iya sa Dios. Ang Balaang Espiritu mopataas lamang sa pangalan ni Jesus ug wala nay lain (1 Corinto 12:3).

3. Maghatag ug pag-uyon ug kalinaw sa kasingkasing (Inner Witness)

- Ang tingog sa Dios maghatag ug kalinaw sa atong kinasuloran (Colosas 3:15) apan ang tingog sa kaaway maghatag ug kaguol ug kasamok (Salmo 55:2-3).

4. Mouyon sa ubang mga pangulo nga puno sa Espiritu (Confirmation)

- Nag-ingon ang Biblia nga ang tanan kinahanglan ma-establisar pinaagi sa duha ngadto sa tulo O ka testigo (Mateo 18:16). Kung aduna kitay nadunggan nga tingog, ilabi na kung nalambigit kini ug dagko nga mga desisyon, kinahanglan ato kining dal-on sa uban labi na gyud sa atong mga pangulo para pagkonpirma kung iya ba gyud kini sa Ginoo o dili.

TULO KA BABAG NGANONG DILI KITA MAKADUNGOG SA DIOS

1. Nagapos kita sa espiritu sa kalibotan (Worldliness).

Ang Kristohanon nga nagapos ug napuno kaayo sa mga butang sa kalibotan (1 Juan 2:16) lisod kaayo makadungog sa tingog sa Dios. Ang kanunay niya madunggan mao ang iyang tawhanong kinaiya ug ang mga

daotang espiritu nga nagatukmod kaniya ngadto sa kadaotan. Kung gusto kita makadungog sa tingog sa Dios kinahanglan atong hinulsolan ang tanang sala nga nagahawid kanato. Atong tangtangan ang tanang babag ug bara sa atong espirituhanon nga dalunggan aron kita makadungog pag-ayo.

2. Puno sa pagduhaduha ang atong kasingkasing (Unbelief).

Ang tanan sa Ginghamlan sa Dios nagalihok pinaagi sa "pagtuo." Naluwas kita sa pagtuo (Efeso 2:8). Gitawag kita paglakaw sa pagtuo (2 Corinto 5:7). Makadawat kita sa Dios pinaagi sa pagtuo (Marcos 11:24). Pinaagi sa pagtuo mapalipay nato siya (Hebreo 11:6). Mao gihapon sa atong pagpaminaw sa tingog sa Dios, kinahanglan kita ug pagtuo. Pagtuo nga siya moistorya nganhi kanato kung kita mosangpit ngadto kaniya (Panultihon 3:5-6). Pagtuo nga ang atong nadunggan dili ato-ato lang kondili iya gyud sa Dios.

3. Wala kitay panahon sa pagpaminaw (Busyness).

Mao kini ang numero unong rason nganong dili kita makadungog sa Dios. Kadaghanan sa mga Kristohanon mituo nga ang Dios mo-istorya pa sa atong kapanahonan, kaso lang wala silay panahon sa pagpaminaw Kaniya. Daghan kaayo silag ginabuhat pero wala silay panahon sa pagpaminaw sa Dios. Sa ilang pag-ampo sila kanunay ang nag-istorya. Kinahanglan mohatag kita ug panahon sa pagpaminaw sa Dios sama kang 'Maria' aron dili kita mapuno sa kabalaka ug kakapoy sama sa nahitabo kang 'Marta' (Lukas 10:38-42).

MAKIGSULTI ANG DIOS KANATO SA TANANG ORAS UG SA TANANG HIGAYON

Gitawag kita pag-ampo sa tanang panahon (1 Tesalonica 5:17). Nagpasabot kini ug makanunayon nga pakighinabi sa Dios. Ang Dios nga Amahan gusto kaayo mo-istorya ngadto sa iyang mga anak. Sa tinuod, "istoryador" kaayo ang atong Ginoo tungod kay gusto siya ug buhi ug makanunayon nga relasyon kanato.

MAKADUNGOG KITA BISAN ASA UG BISAN UNSANG ORASA

Kung lalom kita ug relasyon sa Dios makadawat kita ug mga mensahe gikan kaniya bisan ug wala kita mangayo niini. Sama sa nahitabo kang Felipe (Buhat 8:26-30), Ananias (Buhat 9:10-17), Pedro (Buhat 10:9-11), Bernabe ug Saulo (Buhat 13:2), ug Pablo (Buhat 16:6-10) paghisgot lang ug pipila sa libro sa Mga Buhat. Basta maayo lang ang atong relasyon kaniya makadungog kita sa iyang tingog bisan asa ug bisan ang orasa. Dili lisod ang pagpaminaw sa Dios kung ang atong espiritu usa sa iyang Espiritu. Kinahanglan pareha kita ug "frequency" sa Dios aron kanunay makadungog sa iyang tingog.

PAG-APLIKAR NGA MGA PANGUTANA:

- Nakadungog na ba kita sa tingog sa Dios? Makanunayon ba o talagsa ra?
- Sa tulo ka babag nganong dili kita makadungog sa tingog sa Dios, asay anaa kanato?
- Kinahanglan ba gyud nga makadungog kita sa Dios sa dagkong mga desisyon?

UPAT KA PAAGI SA PAGKINABUHI (Discipleship Series: Lesson 5)

Aduna ray upat ka paagi nga imong ikinabuhi ang imong kaugalingon dinhi sa kalibotan. Sa upat, tulo niini ang dili sakto tungod kay dili kini mao gi plano sa Dios nganhi kanato. Ang tanang tawo sa kalibotan anaa lang sa usa niining upat ka paagi sa pagkinabuhi.

UPAT KA PAAGI PAGDALA SA IMONG KINABUHI:

1. PAG USIK-USIK SA KINABUHI

“Si Jesus mipadayon sa pag-ingon, ‘Dihay us aka tawo nga may duha ka anak nga lalaki. Usa ka adlaw niana, ang manghud miingon sa iyang amahan, ‘tay hatagi na ako sa akong bahin sa katigayonan.’ Busa gibahin sa amahan ang katigayonan tali sa duha niya ka anak. Tapos sa pipila ka adlaw, gibaligya sa manghud iyang bahin ug malingyaw siya sa layong dapit diin giusikan niya ang iyang salapi sa mga kahilayan, hanngtod nga nahurot ang tanan. Unya miabot ang us aka dakong gutom niadtong dapita, ug gihatod siya ngadto sa pagkawala gayo’y nahot.”

Lukas 15:11-14

- Adunay mga tawo nagusik-usik sa ilang katakos, bahandi ug panahon sama sa gibuhay sa kamanghorang anak nga lalaki nga atong gibasa sa itaas nga mmga pasahe. Nalulong sila sa mga kahilayan sa kalibotan. ***Ang ilang kuwarta ug panahon nausik tungod sa walay pulos nga bisyo sap ag-***

inom, pagdroga, pagsigarilyo, pagsugal, pakghilawas, ug uban pang mga daotang binuhatan. Nagapos sila sa daghang mga sala. Kining mga tawhana wala lang naga-usik-usik kondili nagadaot pagyud sa ilang kaugalingon, pamilya, ug kaugmaon. Ang ilang kinabuhi samok kayo tungod kay naa sila sa kangitngit. Ang pagpakasala mohatod kanato sa pagkawala gayo'y nahot, sama sa nahitabo sa kamanghorang anak sa parabola. Panahon na sa pagmata ug sa pagbalik ngadto sa Amahan sa langit aron makabaton kita ug bag-o nga kinabuhi.

2. PAGKINABUHI PARA LANG SA KAUGALINGON

"May us aka dato nga nagsul-ob s labing mahal nga bisti ug nagpuyo nga luho kayo. May usa usab ka kabos nga gi nganlag Lazaro, kansang lawas nalukop sa nuka, ug pgadad-on siya ngadto sa dato. Ug bisan ang mga ironanuol ug mutilap sa iyang nuka."

Lukas 16:19-21

- Ang tawo nga dato sa itaas nga mga pasahe nakasala sa atubangan sa Dios. Ng iyang sala dili tungod kay siya dato ug anaa sa maayong kahimtang sa kinabuhi kondili ang pahka walay pagpakabana sa mga nanginahanglan sa iyang palibot.
- Kadaghanan sa mga tawo, dato o pobre, anaa niini nga sala: **walay pagpakabana sa nanginahanglan.** Gi tawag kini sa atong Ginoo ug "*mga kanding*" (Mateo 25:32, 41-45). Dili sa kahibalo motabang sa uban hinuon mogamit silag mga tawo para sa ilang kaugalingong kalamposan. Bisan ang Dios gusto pa nila gamiton para matuman ang ilang mga tawhanong ambisyon ug pangandoy.

- Ang ilang panan-awon mao lang ang pagpadato ug pagpataas sa ilang kaugalingon ug wala silay panahon pagpadato diha sa Dios. Si Jesus naghigot niining matanga sa tawo; nga gitawag niya ug "buang" pinaagi sa usa ka samingay sa Lukas 12:16-21:

"Dihay usa ka dato nga may yuta nga maayog abot. Namalandong siya, 'Wala na akoy kabutangan sa tanan kong abot. Unsa may angay kong buhaton? Ah kini mao akong buhaton,' miingon siya sa iyang kaugalingon; 'gub-on ko ang akong kamalig ug magtukod pa ako ug labi pang dako, diin akong tigumon unya ang akong abot ug ang uban kong mga kabtangan. Unya muingon ako sa akong kaugalingon: pagkapalaralan nimo, Ondo! Anaa na kanimo ang tanang mga butang nga imong gikinahanglan alang sa daghang katuigan. Pagpahayahay na lang, kaon, inom, paglipay!' Apan ang Dios miingon kaniya, 'Oy, buang! Niini gayng gabhiona ikaw mamatay; unya kinsa may makapag-iyang nianang tanan mga butangnga imong gitigom alang sa imong kaugalingon?' ug mitapos ni Jesus pag-ingon; 'Mao kini ang mga mahitabo knaila nga magtigom ug mga bahandi alang sa ilang kaugalingon apan dili dato sa atubangan sa Dios.'"

3. PAGKINABUHI PARA SA TAWHANON NGA KATUYOAN

"Mga igsoon, gipangandoy ko ang bug-os nga kasingkasinng nga maluwas unta ang akong isigka-Judio ug nag-ampo ako sa Dios alang kanila. Kay saksi ako nga **mainiton kayo sila sa pag-alagad sa Dios. apan ang ilang pag-alagad wala magsukad sa matuod nga kahibalo,** kay wala man sila masayod sa paagi sa Dios, sa pagmatarong sa tawo."

Roma 10:1-3

- Sa itaas nga mga pasahe Makita nato nga si Apostol Pablo nag-ampo sa Dios para sa iyang isigka-Judio nga maluwas unta, kay nakita niya nga ang ilang kainit sa pagpangalagad sa Dios kawang lamang tungod kay wala kini mabasi sa kamatuoran. Wala nila mahibaloi ang paagi sa Dios pagmatarong sa tawo busa migamit sila ug mga pamaagi nga tawhanon (Roma 10:3)
- Kining ika-tulo nga klase sa tawo adunay pagpakabana sa uban ug nagalihk aron sila makatabang sa mga nanginahanglan. Ang problema lang kay ang ilang motibo, pamaagi ug tumong yutan-on (earthly). Ang ilang motibo sa pagtabang sa uban para sa kahimayaan sa tawo ug dili sa Dios. ang ilang mga pamaagi dili sibo sa mga prinsipyo sa Biblia. Ang ilang tumong mao ang pagpataas sa ilang pundok, pagtulon-an ug pangulo. Kini nga klase sa pagpangalagad patay atubangan sa Dios bisan nindot kini atubangan sa tawo.

4. PAGKINABUHI SIBO SA PLANO SA DIOS

“Unya nibati ko ang tingog sa GINOO nga nag-ingon, “Kinsa may akong ipadala, ug kinsa man ang moadto alang kanamo?” unya miingon ako, ‘ **Ania ako. Sugo ako.**’”

Isaias 6:8

- Ang ika-upat nga klase sa pagkinabuhi mao ang pag-uyon sa tawag sa Dios aron ang iyang plano matuman dinhi sa yuta. Mao kini ang gibuuhat ni Propeta Isaias sa iyang

kapanahonan. Miingon siya, “***ania ako Ginoo gamita sa imong katuyoan.***” Atong isalikway ang tanang babag ug atong ihalad ang atong kaugalingon para magamit kita pag-ayo sa katuyoan sa atong Ginoo (2 Timoteo 2:21). Ato lang makab-ot ug masinati ang tinuod nga kagawasan kkung nagpagamit kita sa sibo sa plano sa Dios nganhi kanato. Ang katagbawan anaa sa ‘hingpit nga kabubut-on sa Dios.

PAG-APLIKAR SA KAUGALINGON:

- Sa upat ka paagi sa kinabuhi, asa nato makita ang atong kaugalingon?
- Andam k aba mosalikway sa imong mga tawhanong pangandoy aron motuman sa tawag sa Dios?

GAGMAY'NG PANAGTIGOM

(Discipleship Series: Lesson 6)

usa sa mga batasan(habit) nga kinahanglan nato ipadayon mao ang makanunayon nga panagtigom sa mga Kristohanon gikinahanglan kini aron dili kita mawala sa Ginoo ug madala sa iyang pagbalik. Ang Biblia nagmando nga,

“Dili nato undangon ang **batasan sa panagtigom**, sama sa ginabuhat sa uban. Hinunoa, magdasigay kita labi na kay nasayod kamo nga hapit moabt ang adlaw sa pagbalik sa Ginoo.”

Hebreo 10:25

DUHA KA LUGAR SA PANAGTIGOM

Adunay duha aka lugar diin nagakatigom ang mga magtutuo sa Bag-ong Tugon. Sa ‘templo’ (dinagko nga panagtigom) ug sa ‘puloy-anan’ (gagmay'ng panagtigom).

“Nagpadayon sila sa pagtigom kada adlaw didto sa **templo**, ug naghiusa sila sa pagpangaon uban sa masaya ug mapaubsanong kasingkasing didto sa ilang mga **puloy-anan**.”

Buhat 2:46

“Ug matag adlaw didto sa templo ug sa mga **puloy-anan** nagpadayon sila pagtudlo ug pagwali sa Maayong Balita mahitungod kang Jesus nga Mesiyas.”

Buhat 5:42

GAGMAY'NG PANAGTIGOM SA BALAY

Kadaghanan sa mga Kristohanon karon magkita lang “Domingo” sa simbahan. Ang ilang mga panagtigom nga gina-apilan puro lang ‘dinagko’ (big meetings) ug walay ‘ginagmay’ (small meetings). Walay daotan niini pero kulang kini kay aunay atong makuha sa ‘ginagmay’ng mga panagtigom’ nga dili nato makuha sa ‘dinagko nga panagtigom’. Makita nato sa Biblia nga ang mga magtutuo kanunay nagatigom sa ilang puloy-anan.

“Nasayod kamo nga wala ako’y gihikaw bisan unsa nga makatabang kaninyo sa atubangan sa katawhan ug diha sa inyong mga puloy-anan.”
Buhat 20:20

“ipangumosta usab ako sa mga magtutuo nga magtigoman sa ilang balay.”

Roma 16:5

“nangumosta kaninyo ang mga iglesia sa lalawigan sa Asia; sa kinasingkasing, si Priscila ug si Aquila ug ang mga magtigoman sa ilang balay nangamusta kaninyo diha sa Ginoo.”

1 Corinto 16:19

“Ihatag ang amoang labing mainitong pnghinaot ngadto sa mga kaigsoonan sa Laodicea, ug kang Nimfa ug sa iglesia nga magtigom sa iyang balay.”

Colosas 4:15

“Alang kang Filemon nga among higala ug kauban sa buhat, ug sa mga magtutuo nga magtigoman sa imong balay...”

MGA KATUYOAN SA GAGMAY'NG PANAGTIGOM:

Ang atong panagtigom sa gagmay'ng grupo nga gitawag nato ug 'cell group' o 'bible study' adunay mga katuyuan. **Kung walay tumong ang panagtigom sa us aka grupo patay kini nga grupo.** Maghisgot kita karon ug katuyoan sa gagmay nga grupo.

1. **Pag-ebanghelyo (Evangelism)** – pinaagi sa ginagmay'ng grupo nga nabutang taliwala sa komunidad makaila sa Ginoo amg wala pa maluwas. Ang pagdala ug mga kalag nga wala pa naluwasngadto kang Kristo maoy pinakatumong sa "cell group". Mamatay ang grupo kung wala niini nga panan-awon. Kinahanglan ang matag miyembro sa "cell" adunay kasingkasing sa mga tawo nga wala pa nakabaton ug kinabuhi nga kataposan. Kinahanglan ato silang imbitaron sa grupo(cell) aron makabaton ug kaluwasan dinha kang Kristo.
2. **Pagdisipolo (Discipleship)** – ang tumong sa "cell group" dili lang pagluwas sa mga wala pa maluwas kondili pagpatubo usab sa mga malluwas na apan mga bata pa dinha sa Ginoo. Dinhi sa gagmay'ng grupo matudloan ang matag-usa aron mahamtng ilang pagka-Kristohanon. Dinhi sa "cell group" adunay madman ang matag usa.
3. **Pagatiman ug paglig-on (Edification)** – dinhi sa "cell group" adunay paglinig-onay sa matag usa. Adunay mga anahon nga ang us aka magtutuo maluya apas dinhi sa "cell" makabaton siya ug kalig-on. Sa gagmay nga grupo maadman ang matag-usa.
4. **Pagsangkap ug pagpadaghan sa mga Pangulo (Raising of leader)** – tungod sa

dako kaay nga anihonon nga ang us aka kalag nga wala pa nangaluwas u gang kulang sa mga moatiman sa mga bag-ong nangaluwas ang "cell group" maoy pinakamaayong lugar diin ang mga bag-ong mga pangulo mapatindog. Sa "cell" ang matag miyembro ginasangkap aron mahimong pangulo. Kinahanglan nga ang matag miyembro motan-aw sa ilang kaugalingon nga umaabot nga "cell leader". Sa saktong panahon ang matag usa magdala na usab ug gamay nga grupo o "cell group". Busa kianahanglan gyud moapil ang tanang miyembro sa pagsangkap (training) nga ginahatag sa local nga iglesia aron mahimong epektibo nga pangulo (cell leader).

MGA BULOHAON SA "CELL GROUP"

1. **Pag-ilaila (Welcome)** – mao kini ang panahon sa oag-ilhanay sa usag-usa. Panahon kini nga maminaw ug mga testimony ug mga pasalamat. **(tawo ngadto sa tawo)**
2. **Pagsimba (worship)** – mao kini ang panahon nga mohatag kita ug mga pagdayeg ug pagsimba sa Dios pinaagi sa mga awit. **(tawo ngadto sa Dios)**
3. **Pulong (Word)** – dinhi ginahugotan natto ang Dios nga makig-istoya kanato pinaagi s mga pulong sa Biblia. Nagagamit kita ug mga leksyon gikan sa Pagsangkap aron han-ay ug klaro ang atong pagdawat sa pulng sa Dios. **(Dios ngadto sa tawo)**
4. **Pagtrabaho (Work)** – mao kini ang panahon pagplao ug pag-ampo para sa mga tawo nga wala pa sa Ginoo ug sa 'cell group'. **(tawo ngadto sa tawo)**

ANG IGLESIA

(Discipleship Series: Lesson 7)

PAG-APLIKAR NG MGA PANGUTANA:

- Unsay matabang sa “cell group” sa imong kinabuhi? (paghatag ug tulo)
- Nagtinguha ba kita nga sa umaabot nga mga adlaw kita na ang magdala ug “cell group”?

“... ug ibabaw niining bato tukoron ko ang akong iglesia, ug bisan gani ang kamatayon dili gayod makabuntog niini.”

Mateo 16:18b

UNSAY KAHULOGAN SA PULONG “IGLESIA”?

- Ang plong “**iglesia**” sa Grego nga pinulongan mao ang pulong “**ekklesia**” nga ang kahulogan “**mga tinawag**” o sa English pa “**the called out ones**”. Mga tinawag sa Dios dinha ni Kristo. Kita ang iglesia tungod kay dinha ni Kristo mga “tinawag kita” gikan sa kamatayon ngadto sa kinabuhi nga walay kataposan. Gikan sa sala ngadto sa pagkamatarong. Gikan sa kamot sa panulay ngadto sa pamilya sa Dios. ang iglesia dili simbahan (building) kondili mga tawo nga anaa na sa kahayag dinha ni Kristo.

UNSAY IMONG BUHATON PARA MAHIMO KANG KABAHIN SA IGLESIA?

“Ug sa matag adlaw gidungagan sa Ginoo ang ilang pundok ug mga tawo nga nangaluwas.”

Buhat 2:47b

- Sa itaas nga paahe makita nato nga nadungag sa “iglesia” ang mga tawo nga nanguluas. **Kailangan maluwas ka para maparte sa katawhan sa Dios.** dili ka moapil sa pundok sa Dios aron maluwas hinuon kinahanglan ka maluwas ron maapil sa pundok sa Dios nga mao ang iglesia.
- Sa unsang paagi kita maluwas? Si Kristo lang ang makaluwas kanato ug wala nay lain, ug pinaagi lan sa atong pagtuo kaniya kita

maluwas (Buhat 16:30-31). Pinaagi sa dugo ni Kristo napasaylo kita gikan sa atong mga sala ug nahiusa sa Dios ug sa iyang pamilya nga mao ang iglesia (Buhat 20:25). Kung luwas na kita parte na kita sa grupo sa “mga tinawag”.

- Si Kristo ang pultahan sa iglesia sa Dios (Juan 10:9). Dili ka moapil sa ‘iglesia’ aron mahiusa kang Kristo hinuon kinahanglan ka mahiusa kang Kristo aron maapil sa ‘iglesia’. Kinahanglan ka mahiusa sa ‘ulo’ nga mao si Kristo aron maparte sa ‘lawas ni Kristo’ nga mao ang iglesia.

ASA NATO MGAMIT KINING PULONG “IGLESIA”?

Adunay duha ka paggamit niining pulong “iglesia” sa mga Kristohanon:

1. Magamit kini sa **tanang tawo nga parte sa tibuok katawhan sa Dios**. gitawag kini ug ‘tibuok nga iglesia’ (universal church) diin nasakop ang tanang mga Kristohanon. Mao kini ang katawhan diin si Jesus miingon, “...tukuron ko ang akong iglesia...” (Mateo 16:18). Mao usab kini ang iglesia nga gihulagway sa Biblia nga lawas ni Kristo (Efeso 1:22-23). Tanang mga anak sa Dios nga “natawag gikan sa kangitngit ngadto sa kahibulongang kahayag” parte kini nga iglesia (Colosas 1:13-14; 1 Pedro 2:9-10).
2. Magamit usab kini sa mga Kristohanon nga parte lang o tipik lang sa tibuok iglesia. Magamit kini sa mga Kristohanon nga nagatapok sa gagmay nga grupo (Roma 16:5) sa us aka local nga iglesia (Mateo 18:17; 1 Timoteo 3:5), ug sa tanang mga magtutuo sa usa ka lugar (Buhat 8:3; 20:28; 1 Corinto 1:2; 1 Tesalonica 1:1; 2 Tesalonica 1:1).

UNSAY KALAHIAN SA “TIBUOK NGA IGLESIA” GIKAN SA “LOKAL NGA IGLESIA”?

1. Ang tibuok nga iglesia mao nang tibuok katawhan sa Dios pero ang “local nga iglesia” tipik lang niini. Ang tanang Kristohanon sa tibuok kalibotan parte sa tibuok nga iglesia (universal church).
2. Ang local nga iglesia ginapangulohan ug mga tawo nga gibutang sa Ginoo apan ang tibuok nga iglesia minanduan lang ni Kristo (Buhat 20: 28; 1 Pedro 5:1-4; Efeso 1:22).
3. Ang mga “local nga iglesia” mao na makita nga iglesia (visible church) u gang “tibuok nga iglesia” mao na ang dili makita nga iglesia (invisible church). Makita ug mapasundayag ang ‘tibuok nga iglesia’ pinaagi sa ‘mga lokal nga iglesia’ (the universal churches is manifested through the local churches).

TANAN BANG ‘LOKAL NGA IGLESIA’ NGA ATONG MAKITA SA ATONG KOMUNIDA UG NASOD PARTE SA ‘TIBUOK NGA IGLESIA’?

- Dili. Sama nga adunay mga dili tinud nga alagad sa Dios (2 Pedro 2:1-3) ug mga dili tinuod nga katawhan (1 Juan 2:19) aduna usay “mini o dili tinuod na local nga iglesia. Dili taan simbahan nga adunay karatola bahin sa Dios parte sa tibuok nga iglesia (universal church). Adunay mga mini (fake) nga grupo ug mga local nga iglesia nga dili iya ni Kristo.

UNSAON NIMO PAG-ILA SA TINUID NGA LOKAL NGA IGLESIA?

1. SI JESUS ANG MANLULUWAS.

- Sa ‘tinuod nga iglesia’ ang libre nga kaluwasan nga gibayran ni Kristo didto sa krus nasinatian sa mga miyembro. Ang mga

alagad sa iglesia nagkinabuhi dinha ni Kristo ug nakasiguro kayo sa ilang padulngan human sa kamatayon (Filipos 1:21). Ginawali usab nila ang mensahe sa kaluwasan ngadto sa mga wala pa naluwas (Buhat 5:42).

- Sa mga 'mini nga iglesia' ang kadaghanan sa mga miyembro ug mga ministro wala pay kasigurohan sa ilang kaluwasan. Naningkamot pa sila nga makaluwas pinaagi sa mga relihiyosong buhat. Wala nila masabti nga ang kaluwasan pinaagi sa 'grasya diha sa pagtuo' (Efeso 2:8-9).

2. SI JESUS ANG GINAPATAAS DILI TAWO O PUNDOK.

- Sa 'tinuod nga iglesia' diin ang Balaang Espiritu maoy nagalihok, si Jeus ang bida ug ginapataas (1 Corinto 12:3). Gi-ila si Kristo nga Dios nga nagpakatao aron mahimong sakripisyo para sa akong mga sala (1 Juan 4:2). Ang Ginoo maoy sentro sa pagsimba, pagdayeg, ug pahinungod. Siya ang giila nga Ginoo ug pangulo.
- Apan ang 'mini nga iglesia' ang pangulo sa grupo, u gang pangalan sa pundok maoy ginabayaw. Ginatan-aw nila ang ilang kaugalinon nga mao ray sakto ug iya sa Ginoo.

3. SI JESUS BUHI UG NAGALIHOK.

- Ang 'tinuod nga iglesia' kanunay makasinati sa Buhi nga Presensiya sa Dios. Adunay kausaban nga makita sa kinabuhi sa mga miyembro. Ang bunga sa Espiritu makita sa kadaghanan (Galatia 5:22-23). Kanunay usab sila makasinai ug mga milagro tungod sa Buhi nga Dios nga nagalihok sa ilang taliwala (Buhat 2:43; 3:1-10; 4:31; 5:12-16; 6:8).

- Sa mga 'mini nga iglesia' walay kabag-ohan nga makita sa ilang mga miyembro hinuon nagapos kini sa mga nagkalain-laing bisyo ug sala sa kalibotan. Ang ilang mga panagtigom uga kayo ug walay kinabuhi. Aduna silay relihiyon apan walay relasyon sa Buhi nga Dios. nakaila sila sa Dios sa ilang huna-huna apan wala silay mga kasinatian diha sa Ginoo.

4. ANG TIBUOK PULONG SA DIOS MAOY GINASUBAY.

- Ang 'tibuok nga iglesia' nagasubay sa mga mando ug mga prinsipyo sa Biblia. Ang pulong sa Dios maoy hingpit nga autoridad sa tanan nilang ginatuohan ug ginabuhat (2 Timoteo 3:16-17). Ang mga miyembro ginatudluan nga mosalig sa kasulatan isip suga sa ilang mga dlan (Salmo 119:105). Ilang ginatan-aw ang tibuok Biblia nga Pulong sa Dios ug dili pulong lang sa tawo. **Ang Biblia maoy anaa sa ilaa sa iglesia.** Unsay ginasulti sa Biblia maoy ilang ginatuohan ug ginasunod.
- Sa 'dili tinuod na iglesia' ang mga panghunahuna sa tawa ang ginatagaan ug dakong bali. Nagatuo gihapon sila sa Biblia pero ila lang ginapili ang ilang dataon nga pulong sa Dios ug ila lang ginapili ang ilang tuohan sibo sa ilang kagustohan ug kasinatian. **Ilang gitan-aw ang Biblia nga anaa ilalom sa iglesia.** Nagtuo sila nga ang mga pangulo sa iglesia maoy hingpit nga awtoridad ug angay sundon.

5. GINASIMBA ANG DIOS ESPIRITU SANTO UG KAMATUORAN (JUAN 4:23-24)

- Ang pagsimba sa 'tinuod na iglesia' nabasi s "espiritu ug kamatuoran" (Juan 4:23-24). Kini nagpsabot nga ang ilang pagsimba kinasingkasing ug giniyahan sa Espiritu(espiritu) ug ang mga pamaagi saa

ilang pagsimba nabasi sa Biblia(kamatuoran).

- Sa 'mini nga mga grupo' ang pagsimba nabasi sa tradisyon. Nagabuhat lang sila ug mga relihiyosong buhat kay maoy naandan sa katigulangan. Dili kinasingkasing ang ilang pagsimba kay wala kayo sila makasabot sa ilang mga ginabuhat (Mateo 15:8). Daghan usab sa ilang mga pamaagi ang nabasisa tawhanong mga panghunahuna (Mateo 15:9).

KINAHANGLAN BA NA MAPARTE KITA SA TINUOD NA IGLESIA?

- **Kinahanglan gyud!** Sama nga nagkinahanglan kita ug mayo nga "panimalay" aron mahimong "normal" ang mga tawo, nagkinahanglan usab kita ug "**espirituhanon nga panimalay**" nga mayo aron mahimong "normal" nga mga Kristohanon. Adunay mga anak sa Dios nga badlungon lang gihapon hangtod karon bisan ug dugay na sila sa Ginoo tungod kay wala na sila matanom sa buhi, lig-on, ug nagatubo nga local nga iglesia. Natanom sila sa patay nga grupo ug relihiyon diin wala magalihok ang Espiritu sa Dios ug wala ginawali ang kompleto nga pulong sa Dios.

UNSA MAY KAAYOHAN KUNG MATANOM KITA SA TINUOD NA IGLESIA?

1. **Mahiluna kita** – tungod kay anaa ang presensiya sa Dios makabaton kita ug kapahulayan ug kalinaw (Hageo 2:9)
2. **Maatiman kita** – tungod kay ang mga pangulo sa tinuod nga iglesia adunay saktong pagpakabana sa mga miyembro maatiman kta pag-ayo (Hebreo 13:17; 1 Pedro 5:2).

3. **Motubo ug mabag-o kita** – tungod kay iya sa Ginoo ang grupo adunay kinabuhi sa saktong espirituhann nga pagkaon, kini mohatod kanato ngadto sa makanunayong nga pagtubo ug pagpamunga (Salmo 92:12-14).

4. **Makalahutay kita** – tungod sa Ginoo, mga pangulo nga nagpakabana, ug mga mahigugmaong kauban sa iglesia makapadayon gayod kita dinha sa Ginoo.

5. **Magamit kita sa Ginoo** – ang tinuod nga iglesia nagatudlo ug nagasangkap sa ilang mga miyembro aron sila makalakaw sa tawag sa Dios a pagpangalagad.

PAG APLIKAR NGA MGA PANGUTANA:

- Unsay bag-ong mga butang nga atong iaksyon? (paghatag ug duha)
- Makasulti ba kita nga ang atong local nga iglesia nga gina-apilan buhi ug tinuod?
- Unsay kalambigitan sa atong pagsunod sa Ginoo u gang matanom sa tinuod na iglesia?

TRABAHO

(Discipleship Series: Lesson 8)

“Didto gikahibalag niya si Aquila, usa ka Judio nga natawo sa Ponto, nga bag-o pa lang nahiabot sa Italia kauban sa iyang asawa nga si Priscila... Miduaw kanila **si Pablo, ug tungod kay managsama man ang ilang pangita nga mao ang pagpamuhat ug mga tolda**, mitipon siya pagpuyo kanila aron mag-uban sila sa ilang buhat. Kada Adlawng Igpapahulay nakiglantugi siya sulod sa sinagoga aron pagkabig sa mga Judio ug sa mga Griego. Pag-abot ni Silas ug Timoteo gikan sa Macedonia, gigamit ni Pablo ang tanan niyang panahon pagwali sa Maayong Balita. Nagmatuod siya ngadto sa mga Judio nga si Jesus mao ang Mesiyas.

Buhat 18:2-5

Makita nato sa itaas nga mga pasahe nga si Apostol Pablo namuhat ug tolda sa ‘tibuok semana ug sa ‘adlawng Igpapahulay’ nangabig siya ug mga kalag sulod sa sinagoga. Una miabot ang iyang suporta gikan sa Macedonia nga gidala ni Silas ug Timoteo nag-trabaho siya aron aduna siyay kinitaan para maka-suporta sa iyang pagpangalagad sa Dios. Dili daotan ang trabaho basta Makita nato ang sakto nga kapuslanan niini. Maghisgot kita karon ug lima ka rason nganong kinahanglan kita motrabaho.

KUNG ADUNA KITAY TRABAHO...

1. MATAGBO ANG ATONG MGA PANGHINAHANGLANON

“Tudloi ang mga magtutuo sa paggaamit sa ilang panahon pagbuhat sa maayo **aron sila masangkap sa ilang mga gikinahanglan**; dili

maayo nga sila magpuyo nga walay kapuslanan.”

Tito 3:14

- Panalanginan sa Dios ang mga buhat sa atong mga kamot (Deuteronomio 28:8, 12). Maayo nga kinitaan ang moabot kanato kung kita motrabaho. Kini nga kinitaan mao’y atong gamiton pagtagbo sa atong mga panginahanglanon adlaw-adlaw. Dili kita magsalig sa ubang tawo para matagbo ang atong mga panginahanglanon. Nag-ingon si Haring David nga natigulang nalang siya apan wala siya nakakita ug matarong nga tawo nga gipasagdan sa Dios o ang iyang mga anak nagpakilimos sa uban (Salmo 37:25-26). Ang tawo nga kugihan dili gyud magutman ni maglisod (Panultihon 10:4; 12:11; 14:23).

2. M AAYO KITA NGA EHEMPLO SA UBAN

“Wala kami magpadulot ug pagkaon nga wala namo bayri; hinunoa, nagbuhat ug nagbudlay kami adlaw ug gabii aron dili makahasol kang bisan kinsa kaninyo. Gihimo namo kini dili tungod kay wala kami katungod pagpangayog suhol, kondili **aron mahimo kami nga inyong sumbanan**. Samtang diha pa kami uban kaninyo, giingnan namo kamo, ‘Ayaw pakan-a ang dili motrabaho.’”

2 Tesalonica 3:8-10

- Ang tawo nga tapolan, gawas nga mag-antos pag-ayo, mahimo pa gyung dili maayo nga ehemplo sa ubang tawo. Ang Biblia wala nagdasig sa pagkatapolan sa tawo, hinuon, miingon kini pinaagi kang Apostol Pablo nga, *‘ang dili motrabaho, ayaw pakan-a’* (2Tesalonica 3:10).

3. EPEKTIBO KITA NGA MANGALAGAD SA GINOO

“Miduaw kanila si Pablo, ug tungod kay managsama man ang ilang pangita nga mao ang pagpamuhat ug mga tolda..... Kada Adlawng Igpapahulay nakiglantug siya sulod sa sinagoga aron pagkabig sa mga Judio ug sa mga Griego.’

Buhat 18:2-4

- Ang trabaho “dili babg” sa atong pagpangalagad hinuon “instrumento” kini sa maayo ug epektibo nga pagpangalagad sa Dios. Motrabaho kita aron maka-alagad sa Ginoo. Ang atong tumong sa pagpangita ug kuwarta mao ang pagsuporta sa atong kaugalingon, pamilya, ug ministeryo sa Ginoo. Himoang suporta (support system) ang imong trabaho para mabuhay nimo ang katuyoan sa Dios nga mao ang pagluwas ug pagbag-o sa uban sama sa gibuhay ni Apostol Pablo (Buhat 18:2-4).
- Ang imong trabaho dili “pader” kondili “tulay” sa imong pagtuman ug paghuman sa tawag sa Dios. Kung ang imong trabaho babag sa pangpangalagad sa Ginoo pangita ug laing trabaho. O basin kinahanglan lang nimo ug sakto nga paghan-ay sa imong oras (time management) aron mabalanse ang imong pamilya, trabaho, ug ministeryo. Pangayo ug tabang sa Balaang Espiritu nga mahan-ay ang imong mga gipakabili (priorities) kay dili mohatag ang Ginoo kanimo ug trabaho nga makapugong ug makabalda sa iyang tawag sa imong kinabuhi.

4. MAKATABANG KITA SA ADUNAY MGA PAGKINAHANGLAN

“Ug makahatag ang Dios kaninyo ug labaw pa kay sa inyong gikinahanglan, nga tungod niini makabaton kamo sa tanan ninyong

gikinahanglanon, ug sobra pa gani alang sa tanang maayong buhat.”

2 Corinto 9:8

- Pinaagi sa pagtrabaho aduna kitay kinitaan para matagbo ang mga panginahanglan sa uban ug dili lang sa atong kaugalingon. Nagmando ang atong Ginoo nga tabangan ang mga kabos ug nanginahanglan (Mateo 26:35-45; Santiago 1:27). Apan unsaon man nato pagtabang kanila kung wala kitay igo ug dako nga kinitaan. Unsaon man sab nato pag-uswag kung dili kita motrabaho?
- Ang plano sa Dios nga kita ang mopahulam ug dili ang manghulam (Deuteronomio 28:12). Gusto sa Dios nga mouswag kita sa panalapi nga bahin aron makatabang sa mga nagkinahanglan. Dili maayo nga mangayo lang kita sa Dios para sa atong kaugalingon ug para sa atong pamilya. Walay daotan kung daghan ug kuwarta basta sakto lang ang atong kasingkasing ug tumong.
- Sa atong pagtabang sa mga nanginahanglan ang Espiritu Santo maoy mogiya kanato. Wala kita gitawag pagtagbo sa tanang panginahanglanon nga atong Makita sa kalibotan kondili kadto lang gisugo sa Ginoo. Unsay gisulti sa Dios mao ray atong buhaton. Sa atong pagtabang sa uban ato sang tan-awon nga dili sila mahimong mga tapolan o “parasites.” Adunay panahon sa paghatag ug isda ug aduna say panahon nga tudloan ug tabangan nato sila unsaon pagpangisda.

5. MAKASUPOORTA KITA SA GINGBUHATON SA DIOS

“Dad-a ang tibuok nga ikapulo ngadto sa Templo aron adunay pagkaon didto.”

Malaquias 3:10a

- Kung aduna kitay sakto nga trabaho makahatag kita ug dako sa atong local nga Iglesia pinaagi sa atong mga **ikapulo ug mga halad**. Kung aduna kitay kinitaan makasuporta usab kita sa mga alagad sa Dios nga atua sa laing lugar mga naga-misyon pinaagi sa atong mga espesyal nga halad, sama sa gibuhat sa mga taga-Filipos ngadto kang Apostol Pablo (Filipos 4:14-18).

ADUNAY DUHA KA KLASE NGA PAGTRABAHO

1. Nagtrabaho ka sa uban. (employee)

Mga kaayohan sa nagtrabaho sa uban:

- Klaro ang imong kita o suweldo kada adlaw.
- Makanunayon (stable) ang imong kita kada bulan.

2. Nagtrabaho ka sa imong kaugalingon. Ikaw and amo. (Self employed)

Mga kaayohan sa nagtrabaho nga sila ang amo:

- Adunay posibilidad nga modako pag-ayo ang imong kinitaan.
- Makabuhat ka unsay imong gusto buhaton o himuon. Ikaw ang “boss.”
- Makapadaghan ka sa imong negosyo o trabaho
- Ikaw ang nagbuot sa imong oras ug dili ang uban.

MGA LAKANG ARON IMONG MAHIBALOAN ANG TRABAHO NGA PARA KANIMO:

1. Ayoha ang imong relasyon sa Dios (Roma 12:1-2).
2. Suta-a unsay imong mga tinguha o gusto buhaton (Salmo 37:4).
3. Tan-awa unsay anaa sa imong mga kamot – abilidad o katakos (Deuteronomio 8:18).
4. Paminaw sa giya sa Ginoo ug tan-awa unsay mga oportunidad nga iyang ginaabli (Panultihon 3:5-6; Gipadayag 3:7).

MGA PAHIMANGNO SAMTANG IKAW NAGATRABAHO:

1. Pagbantay nga dili ka mahulog sa paghigugma sa salapi (1 Timoteo 6:10)
2. Pagbantay nga dili masimang ang imong panan-awon sa pag-alagad sa Dios (Mateo 6:24).
3. Pagbantay usab nga dili nimo mapasagdan ang imong trabaho tungod lang sa ministeryo. Kung madaot ang imong suporta (trabaho) maadot usab ang imong ministeryo. Pagbaton ug balanse nga kinabuhi . Una ang Dios, ikaduha ang pamilya, ikatulo ang trabaho, ug usa pa ang ministeryo. Nganong nauna ang trabaho kay sa ministeryo? Sa ako nang gisulti sa unahan, ang trabaho maoy suporta sa imong ministeryo busa kinahanglan kini mauna.

UPAT KA KLASE NGA MIYEMBRO SA LOKAL NGA IGLESIA /CHURCH

1. Anaay kuwarta kay adunay trabaho pero walay ministeryo.

2. Anaay ministeryo pero walay kuwarta kay wala trabaho.

3. Walay trabaho ug wala pa gyud ministeryo.

4. Adunay trabaho ug ministeryo.

PAG-APLIKAR NGA MGA PANGUTANA:

- ❖ Paghatag ug tulo ka butang nga nakatandog sa atong leksiyon? Ngano man?
- ❖ Asa ka sa upat ka klase nga miyembro sa local nga Iglesia? Sa upat asa ang sakto?

ULIPON SA DIOS

(Discipleship Series Lesson 9)

“Angayng batonan ninyo ang hunahuna nga gibatonan ni Kristo Jesus nga mao kini: Diha niya kanunay ang kinaiya gayod sa Dios, apan wala siya maghunahuna pagpakigtupong sa Dios pinaagi sa kusog. Kondili sa iyang kaugalingong kabubut-on ya kining gibiyaan. Ug **gisul-ob niya ang kinaiya sa usa ka sulugoon.** Natawo siya sama kanato ug nakita siya ingon nga tawo; Nagpaubos sya ug nagmasinugtanon hangtod sa kamatayon-ang yang kamatayon sa krus.”

Filipos 2:5-8

PAGBATON SA HUNAHUNA NI KRISTO JESUS

Gimandoan kita nga magbaton sa hunahuna ni Kristo (v. 5) Tungod kay ang atong panghunahuna nasambogan sa mga pagtulonan nga sukwahi sa mga pamaagi sa Dios. Pinaagi sa television, radyo, ug mga basahon miabot kanato ang daghang sayop nga mga panghunahuna. Bisan gani sa panimalay, eskuwelahan, panggobyerno ug mga traditional nga simbahan nakadawat kita ug mga pagtulonan nga dili uyon sa Biblia. Adunay mga maayong butang nga atong nakuha niining mga establisyementoha pero sa makadaghan aduna usay mga “basura” nga nakadaot kanato. Busa gitawag kita pagbag-o sa atong mga karaang panghunahuna aron kita mabag-o (Roma 12.2).

DIOS NGA NAGPAUBOS UG NAHIMONG SULUGOON

Nag-ingon sa Filipos 2 bersikulo 6 ngadto sa 8 nga bisan ug Dios si Kristo wala niya gamita ang iyang gahom pagka-Dios, hinuon, nagpakatawo

siya. Tawo nga nagbaton ug kinaiyahan sa usa ka sulugoon. Miingon si Jesus nga siya mianhi dili para alagaran kondili para moalagad (Mateo 20:28). Ang tanan niyang mga ginabuhat sibo sa katuyoan sa iyang Amahan (Juan 5:19-20). **Ang hunahuna ni Jesus sa dihang mianhi siya sa kalibotan mao lang ang pagtuman sa kabubut-on sa Amahan-ang pagluwas sa tibuok kalibotan** (Juan 3:16 Lukas 19:10) Si Jesus nangalagad pinaagi sa pagpakamatay sa krus aron pagbayad sa sala sa kalibotan ug pagluwas sa tanang mga makasasala (Juan 1 29). Siya lang ang makabayad sa atong mga sala tungod kay siya lang ang walay sala (2 Corinto 5:21, 1 Pedro 2:22). Nagpaubos siya ug nahimong instrumento ug sulugoon sa Amahan

ANG TINUOD NGA ANAK SA DIOS MOALAGAD

Kita usab nga mga anak na sa Dios kinahanglan mahimong mga sulugoon. Dili kita moalagad para mahimong mga anak sa Dios, hinuon, tungod kay mga anak na kita sa Dios (pinaagi sa atong pagtuo kang Jesus) moalagad kita sa atong Amahan sa langit. Gitawag kita kada adlaw pagdumil sa atong kaugalingon ug pagpas-an sa atong kaugalingong krus (Lukas 9:23). Ang atong krus simbolo sa atong tagsatagsa ka responsabilidad sa Gingharian sa Dios. Kita ang gisangunan pagpadayon ug paghuman sa gibuhat ni Kristo Jesus didto sa krus sa kalbaryo (Lukas 24:47) Kita ang mo-implementar sa iyang "*nahumang buhat*" didto.

"DIAKONO" UG "DOULOS"

Ang usa sa mga timaan sa hamtong nga Kristohanon dili ang iyang kadugay na dinha sa Ginoo o ang yang kadaghan ug kahibalo sa Biblia kondili ang iyang "kapasidad modawat ug responsabilidad sa ministryo." Tanang mga hamtong nga anak sa Dios nangalagad gyud.

Adunay duha ka pulong sa Grego nga pinulongan sa pulong "*alagad*": **diakono** ug. Ang Kristohanon nga nangalagad na puwede mahulog lang sa usa, '*diakono*' o '*doulos*'

UNSAY KALAHIAN SA DUHA?

1. Diakono - Usa ka Kristohanon nga nangalagad na sa Dios pero siya pa ang nagbuot sa iyang katungod (rights). Siya ang nagbuot sa iyang pag-alagad sa Dios. Nagapili siya unsay iyang buhaton para sa Ginoo. Sa makadaghan nagatan-aw pa siya sa mga ganti nga iyang makuha sa pagpangalagad. Gusto siya mapasidunggan sa mga maayong butang nga iyang nahimo. Tanang nangalagad sa Dios nagsugod sa pagka-diakono

2. Doulos - Usa ka alagad sa Dios nga midumili na pagtuman sa iyang kaugalingong pagbuot ug nga ang tinguha mao na lang ang pagtuman sa kabubut-on sa Dios. Dili na siya interesado nga mapasidunggan pa o magantihan pa, basta mapalipay niya ang iyang agalon malipay na siya. Ang usa ka "doulos" nagapos na sa iyang agalon sa dili pinugos nga paagi. Ang iyang kinabuhi ug dungog anaa na sa iyang agalon.

ULIPON SA DIOS

"Inigpalit ninyog ulipon nga Hebreo, paalagara siyag unom ka tuig. Sa ikapitong tuig buhii siya ug ayaw pabayra. Apan kon ang ulipon moingon, "Gihigugma ko ang akong agalon ug ang akong asawa ingon man ang akong mga anak, ug dili ako buot mobiya dinhi, dad-on siya sa iyang agalon ngadto sa Dios, ug unya ngadto sa pultahan o sa marko sa pultahan, ug lungagan niya ang dalunggan sa ulipon, ug maulipon siya sa tibuok niyang kinabuhi.

Exodo 21:2; 5-6

Upat ka butang bahin sa ulipon:

1. Ang pagpaulipon bunga sa dakong gugma sa ulipon ngadto sa agalon. Ang atong pagkaulipon sa Dios dili pinugos kondill kinasingkasing. Bunga kini sa atong paghigugma kaniya nga nagbayad sa atong mga sala ug nagluwas sa atong kalag gikan sa silot (Galacia 2:20). Nasayod kita nga siya maoy unang nahigugma kanato (1 Juan 4:19).

2. Ang ulipon moalagad lang gyud sa panimalay sa iyang agalon. Ang panimalay sa iyang agalon mao nay iyang panimalay. Nagpasabot nga ang iyang panimalay anaa na sa iyang agalon. Dili na siya maghimo ug kaugalingong panimalay. Ang tanan niyang ginabuhat nasentro na sa panimalay sa Ginoo (Hageo 1:2-9).

3. Ang ulipon maminaw ug motuman lang sa tingog sa iyang agalon. Ang dalunggan sa ulipon pagabangagan sa agalon nga ang pasabot usa na lang ka tingog ang iyang ginapaminawan, ang tingog sa iyang agalon. Ang ulipon sa Dios dili na maminaw sa iyang kaugalingon, sa ubang tawo o bisan gani sa iyang mga sitwasyon. Ang iyang espirituhanong dalunggan iya lang gyud sa Espiritu sa Dios (Roma 8:14). Kong maminaw siya ug tawo o sitwasyon ang iyang ginapangita mao ang tingog sa iyang agalon nga mao ang Dios. Ang iyang tinguha mao ang pag-ila ug pagtuman sa kabubut-on sa Ginoo sa tanang sitwasyon ug sa tanang panahon (Efeso 5:15-17; Santiago 4:13-15).

4. Ang sulugoon ulipon hangtod sa kahangtoran. Sa dihang mabangagan na ang dalunggan sa sulugoon ulipon na siya hangtod sa iyang kamatayon. Ang "doulos ulipon sa Dios hangtod sa kahangtoran. Walay pahulay o "retirement" ang atong pagka-alagad sa Dios.

Alagaran nato ang Dios hangtod sa pagbalik ni Kristo (1 Tesalonica. 1:9-10).

PAG-APLIKAR NGA MGA PANGUTANA:

- ❖ Unsay tawag sa anak nga walay pagpakabana sa panimalay sa iyang amahan?
- ❖ Nakabaton na ba kita sa hunahuna ni Kristo sa dihang siya mianhi sa kalibotan?
- ❖ Andam ba kita mahimong ulipon sa Dios? Andam naba kita motuman bisan unsa?
- ❖ Ang ato bang mga ginabuhat sentro sa pagpalambo sa panimalay Dios? Ngano man?

Ang Sundalo sa Dios (Discipleship Series: Lesson 10)

“Busa ang mga pangulo sa Israel miadto kang David didto sa Hebron, ug nakigsabot siya kanila sa atubang sa Ginoo, ug gidihogan nila si David ingon na hari sa Israel. Katloan ka tuig ang edad ni Davidsa pagsugod niyang hari, ug naghari siya sulod sa 40 ka tuig.”

2 Samuel 5:3-4

Nganong milapad ang Gingharian sa Dios sa panahon ni David? (tulo kabutang)

1. Tungod sa Dios nga naa sa kinabuhi ni David.
2. Tungod sa pagtuman ni David sa tawag sa Dios.
3. Tungod sa mga bantugang sundalo nga nagpaluyo kang David.

Unsang matang sa mga tao ang miduol kang David una sila nahimong bantugang sundalo?

“Unya ang *nagkalisod-lisod* ug ang mga *utangan*, ug ang mga *diskontento* miuban sa kaniya; ug siya nahimo nilang pangulo. Mga 400 sila.”

1 Samuel 22:2

1. Mga tawo sila nga nagkalisod-lisod.
 2. Mga tawo sila nga utangan.
 3. Mga tao sila nga diskonte.
- Ayaw tan-awa unsa ka karon hinuon tan-awa unsay mahimo sa Dios kanimo sa unahan.

Unsay gibuhath niining mga tawhana nga puno sa panginahanglanon?

- Miila ug mipasilong sila sa pagkapangulo ni David (1 Samuel 22:1-2). Ang Dios adunay giandam nga mga tawo nga maoy iyang gamiton pagbag-o ug pagsangkop kanato aron mahimo kitang mga batid nga sundalo sa Ginoo. Kinahanglan pangitaon ug mosabmitar ta kanila. Kung wala sila, magpabilin ta nga mga bata sa pagtuo.

Unsay mga kinaiyahan sa tulo sa pinakinilang mga sundalo ni David?

1. JOSE-BASEBET (Josheb-Basshebeth) 2 Samuel 23:8

- Mainiton nga mogamit unsay naa kanila bisan ug unsa kini ka gamay.

(Si Jose-basebet nakapatay ug 800 ka kalaban sa us aka sangka ginamit ang usa lang ka hinagiban)

Ang Dios gusto mogamit unsay naa kanato bisan ug unsa ka gamay. Puwede ba magamit sa Dios ang Kristohanon nga adunay usa lang ka bersikulo sa pagluwas sa 800 ka kalag? Puwede kaayo! Bisana unsa pa ka gamay basta atong gamiton aduna gyud kini kahimoan.

Ang paagi sa panulay mao nga ipatan-aw kita sa mga wala pa kanato ug sa atong mga kaluyahon ug dili sa unsay anaa na kanato. Ang tinuod “daghan kaayo” kita ug nadawat sa Amahan tungod kang Kristo nga ania kanato. Ang Biblia nagsulti, **‘Magpasalamat kita sa Dios ug Amahan sa atong Ginoong Jesu-Kristo nga nagpanalangin knato sa tanang espirituhanong gasa sa langit diha sa atong pagkahiusa kang Kristo’** (Efeso 1:3)

2. ELEASAR (Eleazar) 2 Samuel 23:9-10

- Mobarog ug dili moatras taliwala sa problema.

(Taliwala sa panggubatan si Eleasar lang ang wala moatras sa mga kasundalohan ni David ug tungod niini ang Dios naghatag ug kadaogan.)

Tugoti nga ang problema ang moatras ug dili ikaw. Walay problema nga makapildi kanimo gawas kung imo kining tugotan. Ayaw ug atras. Padayon!

Nganong ang uban nga nangalagad miatras sa ministryo?

- i. Kahadlok – mapalpak, sa tawo, ug mudala ug dugang responsibilidad (fear)
- ii. Pagbingkil-bingkil sa mga kauban. (conflict & misunderstanding)
- iii. Kalibog sa panan-awon ug sa mga pamaagi sa iglesia. (confusion/disillusionment)
- iv. Espirituhanong kakapoy ug pagkabugnaw (Discouragement/lukewarm)
- v. Wala nay pagsalig sa pangulo ug sa grupo (lack of trust).

Bisan unsay mahitabo ayaw talikdi ang tawag sa Dios. Kinahanglan mahisama kita kang Pablo nga miingon, “...Wala ako mosupak sa panan-awon nga gikan sa langit” (Buhat 26:19)

➤ Dili mobiya ug andam motahan sa iyang kinabuhi para sa iyang pangulo.

(Si Eleasar wala modagan kay iyang gipanalipdan ang iyang pangulo nga si David. Andam siya magpakamatay para sa iyang pangulo.)

Ang pinakalisod kung ang sundalo nga gitawag pagsuporta maoy mounay pagpatay sa pangulo! Awaton nato ang mga anak ni Noe nga si Sem ug si Japet nga mitabon sa kahubo sa ilang amahan ug dili si Ham nga modepensa sa ilang amahan mapanalanginan apan ang dili, matinunglo (Genesi 9:24-27)

3. SAMA (Shammah) 2 Samuel 23:11-12

➤ Adunay pag-ila nga iyaha ang trabaho (sense of ownership)

(Si Sama wala mibiya sa gamay ng luna nga napuno ug mga batong tungod kay iya kining giisip nga iyaha. Apil siya pagtanom niini).

Kinahanglan atong ilhon nga dili tawo ang nagtawag ug nagbutang kanato sa ministryo kondili ang Dios. Ang Ginoo maoy naghatag kanato niini nga responsibilidad ug ato kinig isipon nga atua. Kita ang gipiyalan sa Dios niini nga trabaho busa pagkamatyan ta kini ug dili biyaan.

➤ Adunay pagsabot nga mohatag siya ug husay sa umaabot nga mga adlaw kon giunsa niya pagdala ang iyang trabaho (sense of accountability).

(Ang mga kauban ni Sama nanagan pag-abot sa Filistahanon tungod kay wala kanila ang pagsabot nga piniyalan sila sa batongan ug manubag sila unsay mahitabo niini.)

Kung adunay kitay pagsabot nga mohatag kita ug husay sa mga butang nga gipiyal kanato sa Ginoo, maningkamot gayod kita nga dili kini mapasagdan hinuon maatiman aron kini magmabungahon.

Dili nato ilubong ang mga talent nga gihatag sa Dios nganhi kanato hinuon ato kining gamiton aron kini mapuslan. Inig abot sa ‘adlaw sa paghusay’ ang gusto nato ang madungog gikan sa atong Agalon mao ang mga pulong. “*Buotan ka ug maayong sulugoon. Sanglit kasaligan ka man sa gamay, piyalan ko ikaw sa daghan*” dili ang mga pulong, “*Walay hinungdan ug tapolan nga sulugoon. Ilabog siya ngadto sa gawas nga mangitngit diin didto siya maghilak ug*

magkagot sa iyang mga ngipon” (Mateo 25:14-30).

PAGPANALANGIN SA UBAN
(Discipleship Series: Lesson 11)

PAG APIKAR NGA MGA PANGUTANA:

- Paghatag ug duh aka butang nga nakatandog kanato sa atong leksiyon? Ngano man?
- Unsay tawag sa sundalo nga walay pagpakabana sa iyang responsibilidad?
- Dawaton ba nato nga kita mga sundalo ni Kristo ug gitawag pagpalambo sa iyang Gingharian ug katuyoan dinhi sa yuta? (2 Timoteo 2:3-4)

Ang panalangin nato dinha ni Kristo dili lang para sa atong kaugalingon kondili para usab sa uban labi na gyud sa mga dili pa mga magtutuo (wala pa naluwas). Giluwas kita sa Dios pag-una aron ang uban nga wala pa kang Kristo maluwas usab. **Gipanalanginan kita aron mahimong panalangin.** Sa unsang paagi nga makapanalangin kita sa uban?

Lima ka paagi aron makapanalangin kita sa mga wala pa naluwas:

1. PAGBALAAN

“Pagbinuotan kamo sa inyong pagkinabuhi tipon sa mga dili pa magtutuo aron kon kamo dauton nila, Makita nila ang inyong mga maayong buhat, ug magdayeg sila sa Dios sa Adlaw sa iyang pagbalik.”

1 Pedro 2:12

- Pinaagi sa atong mga kinabuhi nga nabag-o mapanalanginan ang mga tawo nga anaa sa atong palibot. Tungod sa atong pagkahiusa sa punoan (Jesus) makapamunga kita sa mga bunga sa Espiritu Santo (Juan 15:5; Galacia 5:22-23). **Ang atong diosnon nga kinaiya maoy pinakakusog nga mensahe ngadto sa mga wala pa sa Ginoo nga si Kristo ania kanato ug kita anaa kaniya.** Una kita mowali sa Maayong Balita kinahanglan makita usa ang maayong balita nganhi sa atong mga kinabuhi.

2. PAKIGHIGALA

"Dili ako ulipon ni bisan kinsa; apan nagpaulipon ako sa tanan aron madani ko ang labing daghan. Samtang nag-alagad ako sa mga Judio, nagkinabuhi ako ingon nga Judio aron madani ko sila.; ug niadtong nailalom sa balaod ni Moises, nagkinabuhi ako ingon nga ilalom sa balaod bisan dill ako ilalom sa balaod, aron pagdani kanila. Sa mga dili Judio nagkinabuhi ako ingon nga dili Judio, nga dili ilalom sa balaod sa mga Judio, aron madani ko sila. Wala kini magpasabot nga wala ako magtuman sa balaod sa Dios kay sa pagkatinuod ubos man ako sa balaod ni Kristo. Diha sa mga huyang sa pagtuo nahimo akong huyang sama kanila aron madani ko sila. Busa nagpahiuon ako sa tanang tawo aron maluwas ko ang pipila kanila, sa bisan unsang paagi."

1 Corinto 9:19-22

Si Apostol Pablo kahibalo mopauyon sa tanang tawo aron epektibo siya nga modala kanila ngadto sa Ginoo, Kahibalo siya modala ug relasyon sa tanang matang sa tawo, relihiyoso, o makasasala, kusgan o luya. Wala nagpasabot nga nagpakasala usab siya aron pagdala sa mga makasasala. Klaro kaayo sa Biblia nga si Pablo nagpuyo nga madaogon batok sa sala ug tintasyon (1 Tesalonica 2:10; Galacia 2:20). Ang gihimo ni Apostol Pablo mao ang pakighigala sa mga makasasala nga wala pa kang Kristo. Bisin si Jesus sa iyang kapanahonan wala nagalikay sa mga makasasala hinuon nakigrelasyon siya kanila aron sila makabaton ug kaluwasan ug kabag-ohan (Mateo 9:10-12). Gitawag siya ug *"higala sa mga makasasala"* (Lukas 7:34). Gitawag kita sa Biblia ug kahayag sa kalibotan (Mateo 5:14; Efeso 5:8). ***Ang kahayag dili mopalayo sa nga tawo sa kangitngit hinuon moadto kini kanila aron sila mahayagan!***

3. PAG-ALAGAD

"Busa ipadan-ag gayod ang inyong kahayag atubangan sa mga tawo, aron makita nila ang inyong mga maayong buhat ug magdayeg sila sa inyong Amahan nga atua sa langit"

Mateo 5:16

Usa sa pinaka-epektibo nga paagi pagpanalangin sa uban mao ang pagsilbi kanila. Kadaghanan sa mga tawo gusto gyud alagaran. Apan ang atong Ginoo nagbilin kanato ug ehemplo nga mas maayo pa kita ang makaministeryo kaysa kita ang ginaministeryohan (Juan 13:13; Mateo 20:28). Ang putli nga tinuhoan mao ang pag-atiman sa mga nanginahanglan (Santiago 1:27; Galacia 2:10). **Ang pag-alagad sa uban mao ang pagministeryo sa ilang mga panginahanglanon.** Panginahanglanon ba kana sa pisikal, panalapi, pagbati, hunahuna, o espirtual. Kung atong alagaran ang usa ka tawo atong ginatandog ang iyang kasingkasing ug mapanalanginan siya pag ayo ug posible nga moabli siya sa Maayong Balita.

4. PAGTESTIMONYO

"Apan kamo mao ang piniling katawhan, ang mga harianong pari, ug ang balaang nasod. kamo sa Dios aron magmantala sa mga kahibulongang buhat sa Dios nga nagtawag kaninyo gikan sa kangitngit ngadto sa iyang katingalahang kahayag."

1 Pedro 2:9

Tanang mga anak sa Dios duna gayo'y ikasulti unsa kaayo ang Ginoo sa ilang kinabuhi. Ang matag Kristohanon aduna gyuy testimonyo. Kini nga testimonyo kinahanglan iyang isulti sa uban aron sila usab mapanalanginan. Si Apostol

Pablo, bisan asa moadto, nagatestimonyo gyud *'unsa siya kaniadto sa wala pa sa Ginoo,'* *'giunsa niya pagtagbo ang Ginoo,'* ug *'unsa na siya karon nga anaa na sa Ginoo'*(Buhat 22:2-21; 26:2-23). Kining tulo, (1) imong kagahapon. (2) giunsa nimo pagtagbo si Jesus. (3) unsa ka na karon diha sa Ginoo, importante kaayo sa imong pagtestimonyo. Ang mga Kristohanon nga adunay kasinatian sa Ginoo dili gyud makapugong pagtestimonyo ngadto sa uban (Buhat 4:19-20).

5. PAG-EBANGHELYO

"Miingon siya kanila,' Panglakaw kamo sa tibuok kalibotan ug isangyaw kining Maayong Balita ngadto sa tanang tawo."

Marcos 16:15

Ang pag-ebanghelyo mao ang pagdala sa usa ka tawo nga 'wala pa naluwas' ngadto sa' libre nga kaluwasan nga anaa kang Kristo'. Mando kini sa atong Ginoo ngadto sa tanan niyang sumosunod (Marcos 16:15; Lukas 24:46-47). Mao kini ang gibuhay sa unang iglesia (Buhat 5:42) ug mao usab kini ang kinahanglang buhaton sa tanang Kristohanon karon. Ang tinuod nga disipolo dili lang komitado sa pakigrelasyon kang Kristo kondili komitado usab siya sa pagpakaylap sa Maayong Balita ngadto sa uban nga wala pa naluwas (Marcos 8:35).

PAG-APLIKAR NGANG MGA PANGUTANA

- Sa lima ka paagi pagpanalangin sa uban asa ang wala pa nato ginabuhay?
- Unsay pasabot sa 'ayaw kamo pakighiusa sa mga dili pa magtutuo'(2 Corinto 6:14)?

Nagpasabot ba kini nga dili na kita makighigala sa mga makasasala?

- Puwede ba nga ang usa ka disipolo komitado kang Kristo apan dili komitado sa iyang katuyoan pagluwas sa uban?

PAGPADAGHAN UG LIWAT

(Discipleship Series: Lesson 12)

Busa gibuhat sa Dios ang tawo, lalaki ug babaye ,sama sa iyang dagway; ug gipanalanginan niya sila. Mingon ang Dios," Panganak kamo ug daghan aron malukop ang kalibotan sa inyong mga liwat ug sila'y magbuot niini..."

Genesis 1:27-28

1. Ang Tinguha ug Plano sa Dios

Ang Dios nagbuhat ug tawo sumala sa iyang panagway aron masabtan siya nini. Gusto niya ug ka relasyon. Dili siya masabitan sa uban niyang binuhat (mga mananap, isda, langgam, tanaman, ug uban pa). Tungod kay wala sila gibuhat sibo sa panagway sa Dios. Ang tawo lang ang liwat sa Dios Makasabot siya sa Dios ug ang Dios makasabot usab kaniya. *Ang tinguha sa Dios nga dili lang si Adan ug si Eva ang iyang mga liwat kondil daghan kaayo. Busa iyang gipanalanginan ug gimandoan ang magtiayon sa pagpanganak ug daghan aron malukop ang kalibotan sa iyang mga liwat. Kini nga plano sa pagpadaghan sa iyang mga liwat magsugod lang sa gamay.*

2. Ang Yawa Mibaliktad sa Plano sa Dios

Ang panulay dil maka-panghilabot sa Dios pero puwede siya makapasakit sa Dios pinaagi sa iyang pagdaot sa plano sa Dios. Giilad sa Yawa ang unang babaye ug iya kining gigamit sa pagtintal sa unang lalaki. (Genesis 3:1-7. Timoteo 2:14). Dinhi nagmalamposon ang Yawa sa paghulog sa tawo gikan sa plano ug Himaya sa Dios.

3. Ang Bunga sa Pagpakasala sa Unang Tawo

Sa dihang nakasala ang tawo naputol ang iyang relasyon sa Dios ug ang iyang relasyon sa Yawa nagsugod (1 Juan 3:8). Ang Espiritu sa Dios mibiya sa tawo ug ang mga daotang espiritu ang mipuli pagpuyo (Mateo 12:43-45). Ang panalangin sa Dios mipahawa ug ang tunglo miabot. Ang awtoridad sa Dios batok sa tanang butang nga anaa sa tawo nawala, busa ang mga butang na sa kalibotan maoy nagdumala sa tawo. Ang hulagway sa Dios nawala ug ang kinaiya na sa Yawa ang makita sa tawo (Juan 8:37-44).

4. Ang mga Makasasala Maoy Mikuyanap sa Kalibotan

Sugod sa pagpakasala sa unang tawo, ang sala napasa na sa tanang tawo (Roma 5:12). Ang tawo nga unta anak sa Dios nahimo na hinuon anak sa Yawa (1 Juan 3:10). Tinuod ang tanang tawo naggikan sa Dios pero tungod sa sala ang tanang tawo naulipon na sa mga daotang espiritu (Efeso 2:2). Tungod sa gibuhat ni Adan si Satanas na maoy dios nga nagmando sa hulog nga kalibotan sa kangitngit (2 Corinto 4:4; 1 Juan 5:19). Imbis ang kaliwatan sa Dios ang mapakaylap ang mga liwat na hinuon sa Yawa. Ang mga makasasala ang mikuyanap sa tibuok kalibotan (Galacia 3:22).

5. Si Jesus Mianhi Aron Paglaglag sa Yawa ug Pagluwas sa mga Tawo

Si Jesus mianhi pagguba sa trabaho sa Yawa (1 Juan 3:8, Buhat 10:38). Nagwali siya bisan asa nga ang gingharan sa langit miabot na sa kalibotan (Mateo 4:17). Iyang gipasundayag ang gahom sa Gingharian pinaagi sa paghimo ug mga milagro. Miadto siya sa Krus aron pagbuntog sa kaaway ug sa paghukas sa tanang

gahom sa kangitngit (Colosas 2:15). Didto sa krus giangkong niya ang silot sa atong mga sala ug gibayran ang tanan natong mga sala aron makabaton kita ug libre nga kaluwasan.

6. Ang Pamaagi ni Jesus Pagkuha sa mga Kanasoran

Apan una miadto si Jesus ngadto sa krus mihatag siya ug igong panahon paghimo ug 12 ka disipolo (Marcos 3:13-15). Ang iyang pinaka-estrategiya mao lang gihapon sa sinugdan: ***mapakaylap ang kaliwatan sa Dios sugod sa gamay nga grupo.*** Si Jesus mianhi aron pagluwas sa tibuok kalibotan ug ang iyang pamaagi mao ang pagsangkap ug pagpatindog ug mga lig-on nga disipolo. Mga komitado nga tinun-an nga mopadayon ug mohuman unsay iyang gisugdan (Mateo 24:14).

7. Ang Tanang Magtutuo Gitawag Para Mahimong Disipolo

Diligo nga kita naluwas na. Importante nga ang 'hulagway sa Dios' nga nawala mahibalik nganhi kanato (2 Corinto 3:18). Kinahanglan mahimo kitang mga *disipolo ni Kristo*. Nagpasabot kini nga ang pagtulon-an ni Jesus atong ikinabuhi (Juan 8:31) aron moliwat kita kaniya. Mao kini ang plano sa Amahan nganhi kanato (Roma 8:29). Ang usa ka disipolo liwat sa iyang magtutudio.

8. Ang Tanang Kristohanon Kinahanglan ug Espirituhanong Amahan

Ang tanan gitawag nga mapailalom sa usa ka 'espirituhanong amahan' aron mahimong hamtong nga anak sa Dios. Sama kang Josue ngadto kang Moises (Exodo 33:11), Eliseo ngadto kang Elias (2 Hari 2.2), Pablo ngadto

kang Bernabe (Buhat 11:25-26), ug Timoteo ngadto kang Apostol Pablo (2 Timoteo 2:2) ug Marcos ngadto kang Pedro (1 Pedro 5:13). Walay mahimong "disipolo (disciple) kung dili siya kajibalo mosabmitar ug magpailalom sa usa ka "tigdisipolo" (discipler).

9. Ang Tanang Kristohanon Gitawag Paghimo ug mga Disipolo

Una mibiya si Jesus dinhi sa kalibotan iyang gimandoan ang iyang mga sumosunod paghimog mga disipolo nga maghimo usab ug mga disipolo ug ang proseso magpadayon hangtod malukop ang tibuok kanasaran (Mateo 28:19-20).

10. Pinaagi Kanato ang mga Liwat sa Dios Mokuyanap

Wala lang nagtawag kanato ang Ginoo sa paghamtong kondili gitawag usab kita niya pagpanganak (pag-ebanghelyo) ug pagpadaghan sa iyang liwat (pagdisipolo). Ang usa ka disipolo liwat ni Kristo ug gusto sa Ginoo nga modaghan ang iyang liwat pinaagi kanato. Samtang nagasunod kita kang Jesus ato sang agnihon ang uban pagsunod kanato, sama sa gibuhay ni Apostol Pablo sa iyang kapanahonan, **"...panig-ingon kamo kanako sama nga nanig-ingon ako kang Kristo"** (1 Corinto 11:1)

11. Ang Tinuod nga Disipolo Mobunga ug Daghang mga Disipolo

Ang tinuod nga disipolo mobunga gyud ug mga disipolo (Juan 4:1-2). Mao kini ang usa sa mga timailhan sa hamtong nga sumusunod ni Kristo. Ang hamtong lang nga Kristohanon ang makapahamtong sa uban. Dili nato madala ang uban sa wala pa nato naadtoan. Makahatag lang kita sa uban sa mga kamatuoran nga ato nang nakinabuhi ug nasinatian.

12. Ang Espiritu sa Amahan Anaa Kanimo

Ang imong gikinahanglan aron makapatindog ug daghang mga tinun-an ni Kristo dili ang imong *espirituhanong mga gasa kondili ang Espintu sa Amahan*. Si Jesus sa iyang kapanahonan nahimong epektibo nga amahan ug tig-disipolo ngadto sa iyang mga tinun-an tungod sa Espiritu sa Amahan sa iyang kinabuhi (Juan 14:7-10). Ang pagdisipolo usa ka proseso sa pag-atiman, pagsangkap ug pagpangamahan sa uban. Ang "pagpangamahan" (fathering) mao ang pagtugot sa Amahan pinaagi sa Espiritu Santo nga molihok nganhi kanato ngadto sa uban. Pinaagi sa atong paghatag ug panahon sa atong mga gina-disipolo ang Langitnong Amahan makalihok ngadto kanila ug sila mabag-o, motubo, ug makalakaw sa tawag sa Dios. Mao kini ang gibuhat ni Jesus sa iyang kapanahonan.

PAG-APLIKAR NGA MGA PANGUTANA:

- ❖ Unsay mahitabo sa usa ka anak nga walay amahan nga naga-atiman?
- ❖ Andam ba kita magpailalom sa usa ka *espirituhanon nga amahan o tig-disipolo*?
- ❖ Andam ba kita mohimo ug mga disipolo sama kang Jesus nga atong ginasunod?